



古微書卷二十九

孝經援神契

易建八卦序六十四卦轉成三百八十四爻運機布度其氣
轉易故稱經也

易長於變書考命符授河

宋注曰授河者授河洛以考命符也

按玉海伏羲始畫八卦是謂先天有圖象而未有書夏曰

連山天易也商曰歸藏地易也有法數而未有書文王曰

周易人易也始有書矣又夏殷以不變為占周易以變為

占連山八萬言歸藏四千三百言連山用三十六策歸藏

用四十五策周易用四十九策又易傳孔子云易有四易

一世二世為地易三世四世為人易五世六世為天易游

竟歸竟爲鬼易

乾坤鑿度云仲尼魯人生不知易本偶筮其命得旅請益於商瞿氏曰子有聖智而無位孔子泣而曰天也命也鳳鳥不來河無圖至嗚呼天命之也嘆息而後息志停讀禮止任也史削作不五十究易作十翼明也明易幾教若曰終日而作思之于古聖頤師於姬昌法且作九問十惡七正八嘆上下繫辭大道大數大法大義易書中爲通聖之問明者以爲聖賢矣

又按路史昔楚倚相能讀三墳五典八索九邱之書及孔子求古之史記自二典九邱之外三墳八索已不得而見矣後世不知其何書也孔安國以爲羲炎黃帝之書曰三墳少昊顓鬻唐虞之書曰五典康成從之而賈逵亦以三墳爲三皇時書五典爲五帝常典至馬季長始以三墳爲陰陽始生天地人之三氣五典爲五行之說籍卦論之豈其然哉

又隋書云孔子觀書周室得虞夏商周四代之典刪其善者爲百篇遭秦滅學至漢唯濟南伏生口傳二十八篇又河內女子得秦誓一篇獻之伏生作尚書傳四十一篇

春秋三世以九九八十一爲限隱元年盡僖十八年爲一世自僖十九年盡襄十二年又爲一世自襄十三年盡哀十四年又爲一世所以不悉八十一年者見人命參差不可以齊之義

按公羊注疏解云孔子至聖却觀無窮知秦無道將必燔書故春秋之說口授子貢度秦至漢乃著竹帛問曰春秋說云春秋設三科九旨其義如何答曰何氏作文諡例云三科九旨者新周故宋以春秋當新王此一科三旨也又云所見異辭所聞異辭所傳聞異辭二科六旨也又內其國而外諸夏內諸夏而外夷狄是三科九旨也按宋氏之註春秋說三科者一曰張三世二曰存三統三曰異外內是三科也九旨者一曰時二曰月三曰日四曰王五曰天王六曰天子七曰譏八曰貶九曰絕時與日月詳畧之旨也王與天王天子是錄遠近親疎之旨也譏與貶絕則輕重之旨也又文諡例云此春秋五始三科九旨七等六輔

二類之義以矯枉撥亂爲受命品道之端正德之紀也五始者元年春王正月公卽位是也七等者州國氏人名字子是也六輔者公輔天子卿輔公大夫輔卿士輔大夫京師輔君諸夏輔京師是也二類者人事與災異是也春秋說云春秋書有七缺八缺之義如何答曰七缺者惠公妃匹不正隱桓之禍生是爲夫之道缺也文姜淫而害夫爲婦之道缺也大夫無罪而致戮爲君之道缺也臣而害上爲臣之道缺也僖五年晉侯殺其世子申生襄二十六年宋公殺其世子痤殘虐枉殺其子是爲父之道缺也文二年楚世子商臣弑其君髡襄三十年蔡世子般弑其君胡是爲子之道缺也桓八年正月己卯烝桓十四年八月乙

亥嘗僖三十一年夏四月四卜郊不從乃免牲猶三望郊祀不修周公之禮缺是爲七缺也矣

嚴氏春秋引觀周篇云孔子將修春秋與左邱明乘如周觀書於周史 閔因敘昔孔子受端門之命而制春秋之義使子夏等十四人求周史記得百二十國寶書

孔子作春秋制孝經既成使七十二弟子向北辰星磬折而立使曾子抱河洛事北向孔子齋戒簪縹筆衣絳單衣向北辰而拜告備于天曰孝經四卷春秋河洛凡八十一卷謹已備天乃虹鬱起白霧摩地赤虹自上下化爲黃玉長三尺上有刻文孔子跪受而讀之曰寶文出劉季握卯金刀在軫北字禾子天下服

賁居子曰孝經與周易皆聖人神力護持竟有以之治病以之祛邪者

按齊史顧歡好黃老通解陰陽數術人有病邪者問歡歡曰家有何書答曰惟有孝經而已歡曰可取仲尼居置病人枕邊恭敬之自差也而後病者果愈人問其故答曰善禳惡正勝邪此病者所以差也 又三國典畧徐陵子份有孝行陵嘗遇病甚篤份燒香泣涕跪誦孝經晝夜不息如此者三陵病忽然而愈 南史皇侃性至孝嘗日限誦孝經二十遍以此觀世音經良有以也

魯哀公十四年孔子夜夢三槐之間豐沛之邦有赤烟氣起乃呼顏淵子夏往視之驅車到楚西北范氏街見芻兒摘麟

傷其左前足薪而覆之孔子曰兒來汝姓爲誰兒曰吾姓爲赤誦名子喬字受紀孔子曰汝豈有所見耶兒曰見一禽巨如羔羊頭上有角其末有肉孔子曰天下已有主也爲赤劉陳項爲輔五星入井從歲星兒發薪下麟示孔子孔子趨而往麟蒙其耳吐三卷圖廣三寸長八寸每卷二十四字其言赤劉當起日周亡赤氣起火耀興元邱制命帝卯金麟中央也軒轅大角獸也孔子備春秋者修禮以致其子故麟來爲孔子瑞

按服虔說云麟中央土獸土爲信信禮之子修其母致其子視明禮修而麟至思睿信立而白虎馴言從義成而神龜在沼聽聰知正則名川出龍貌恭性仁則鳳凰來儀

命有三科有受命以保慶有遭命以謫暴有隨命以督行受命

謂年壽也遭命謂行善而遇凶也隨命謂隨其善惡而報之

按宋王及甫天經書朱文公謂類集古今言命極爲該備

以十二星辰歷推人命貴賤始於唐貞元初都利術士李

彌乾聿斯經本梵書程子謂三命是律五星是歷晁氏謂泠州鳩

曰武王伐商歲在鶉火月在天駟日在析木之津辰在斗

柄星在天竈五星之術其來尚矣又世之相傳有黃帝風

后三命一家而河上公實能言之沿及後世臨孝恭有祿

命書陶宏景有三命抄畧唐人習者頗衆而張一行桑道

茂李虛中咸精其書虛中之後唯徐子平尤造其闢奧也

然以甲子幹枝推人所生歲月展轉相配其數極於七百

二十以七百二十之日時其數終於五十一萬八千四百
夫以天下之廣兆民之衆林林而生者不可以數計日有
十二時未必一時唯生一人也以此觀之同時生者不少
何其吉凶之不相同哉唐呂才敘祿命以爲今亦有同年
同祿而貴賤懸殊共命共胎而壽夭更異按魯莊公法應
貧賤又尪弱短陋惟得長壽秦始皇法無官爵縱得祿少
奴婢爲人無始有終漢武帝後魏孝文帝皆法無官爵宋
武帝祿與命並當空亡唯宜長子雖有次子法當早夭此
皆祿命不驗之著明者也誠足以破其舛戾矣

聖王吹律有姓

按禮記疏云天子賜姓賜氏諸侯但賜氏不得賜姓降於

天子也左傳曰天子建德因生以賜姓胙之土而命之氏
諸侯以字爲諡因以爲族官有世功則有官族邑亦如之
以此言之天子因諸侯先祖所生賜之曰姓杜預云若舜
生媯汭賜姓曰媯封舜之後於陳以所封之土命爲氏舜
後姓媯而氏曰陳故鄭駁異義云炎帝姓姜太皞之所賜
也黃帝姓姬炎帝之所賜也故堯賜伯夷姓曰姜賜禹姓
曰姒賜契姓曰子賜稷姓曰姬著在書傳諸侯賜卿大夫
以氏者若同姓公之子曰公子公子之子曰公孫公孫之
子其親已遠不得上連于公故以王父氏爲氏若適夫人
之子則以五十字伯仲爲氏若魯之仲孫季孫是也若庶
子妾子則以二十字爲氏則展氏臧氏是也若異姓則以

古微書卷二十一
父祖官及所食之邑爲氏以官爲氏者則司馬司城是也
以邑爲氏者若韓趙魏是也凡賜氏族者此爲卿乃賜有
大功德者主賜以族若叔孫得臣是也雖公子之身若有
大功德則以公子之字賜以爲族若仲遂是也其無功德
死後乃賜族若無駭是也若子孫若爲卿其君不賜族子
孫自以王父字爲族也氏族對文爲別散則通也

土黃白宜種禾黑墳宜黍麥土蒼赤宜菽白宜稻汙泉宜稻
按管子地員篇九州之土爲九十物每州有常而物有次
羣土之長是唯五粟五粟之狀淖而不朐剛而不穀不溇
車輪不汚手足其種大重細重白莖白秀無不宜也五粟
之土若在陵在山在墳在衍其陰其陽盡宜桐柞莫不秀

長其榆其柳其檉其桑其柘其櫟其槐其楊羣木蕃滋數
大條直以長其澤則多魚牧則宜牛羊其地其樊俱宜竹
箭藻龜檣檀五臭生之薜荔白芷麋蕪椒連五臭所校寡
疾難老士女皆好其民工巧其泉黃白其人夷姤五粟之
土乾而不格湛而不澤無高下葆澤以處是謂粟土粟土
之次曰五沃沃土之次曰五位位土之次曰五蔭蔭土之
次曰五壤壤土之次曰五浮凡上土三十物種十二物中
土曰五恣五恣之狀廩焉如盥潤濕以處其種大稷細稷
虺莖黃秀慈忍水旱細粟如麻蓄殖果木不若三土以十
分之三恣土之次曰五纁纁土之次曰五盭盭土之次曰
五剽剽土之次曰五沙沙土之次曰五壻凡中土三十物

古微書卷二十九
種十二物下土曰五猶五猶之狀如糞其種大華細華白
莖黑秀蓄殖果木不如三土以十分之五猶土之次曰五
弦五弦之次曰五殖五殖之次曰五穀五穀之次曰五鳧
鳧土之次曰五桀凡下土三十物其種十二物凡土物九
十其種三十六 此古人物土之術也惜不傳於後世矣
爲存其畧

石潤苞玉丹精生金椒薑禦温菖蒲益聰巨勝延年威喜辟
兵

按抱朴子仙藥之上者丹砂次則黃金次則白金次則諸
芝次則五玉次則五雲次則明珠次則太乙禹餘糧次則
石中黃子次則石桂英次則石腦次則石流丹次則石紹

次則曾青次則松柏脂茯苓地黃麥門冬木巨勝重樓黃
連石掌杼石家紫一名托盧是也或名仙人杖或名西王
母杖或名天精或名却老或名地骨或名枸杞也

又雷公炮炙論序云若夫世人使藥豈知自有君臣既辨
君臣寧分相制祇如枕毛霑溺立銷斑腫之毒象膽揮黏
乃知藥有情異鮭魚插樹立便乾枯用枸塗之卽當榮盛
無名止楚截脂而似去甲毛聖石開盲明目而如雲離日
當歸止血破血頭尾效各不同蕤子熟生足睡不眠立據
弊筭淡鹵如酒霑交鐵遇神破如泥似粉石經鶴糞化作
塵飛杓見橘花似髓斷絃折劍遇鸞血而如初海竭江枯
投傲波而立泛令鈆拒火須伏修天如要形堅豈忘紫背

留砒住鼎全賴宗心雌得芹花立使成庚礪遇赤鬚水留
 金鼎水中生火非猶髓而莫能長齒生牙賴雄鼠之骨末
 髮眉墮落塗半夏而立生日辟眼雖有五花而自正脚生
 肉杓棍繫若根囊皺旋多夜煎竹木體寒腹大全賴顛鷄
 血泛經過飲調瓜子咳逆數數酒服熟雄遍體癩風冷調
 生側腸虛泄痢須假草零久渴心煩宜投竹瀝除癥去塊
 合仗硝礪益食加觴須煎蘆朴強筋健骨酒是菘鮮駐色
 延年精蒸神錦知瘡所在口點陰膠產後肌浮甘皮酒服
 口瘡舌疝立愈黃蘇腦痛欲亡鼻投硝末心痛欲死速覓
 延胡如斯百種是藥之功 此文亦古而麗者矣錄之以
 志百物皆藥指顧可辨

象鼻必卷鳥喙必鉤琨水伏故去脈蝟多刺故不起超踰楊

柳蟬無力故不食蝙蝠伏匿故夜食蟻無食故不勞無螫故

無心蟹二螯兩端旁行猶螯共也小蟲而欲蜂蠆蟲芒凡蠆毒在

後故言稱芒

戴絰下蠶始生 獸蟄伏獺祭魚則十月終也

按子列子適衛食於道從者見百成髑髏撻蓬而指顧謂

弟子百豐曰唯予與彼知而未嘗生未嘗死也此過養乎

過歡乎種有幾若蠅為鶉得水為鱣得水土之際則為蠅

蟻之衣生于陵屯則為陵鳥得鬱棲則為鳥足鳥足之根

為蟻螬其葉為胡蝶胡蝶胥也化而為蟲生竈下其狀若

脫其名曰駒掇駒掇干日化而為鳥其名曰乾餘骨乾餘

古微書卷二十九
骨之沫爲斯彌斯彌爲食醯頤輅食醯頤輅生乎食醯黃
輓食醯黃輓生乎九猷九猷生乎督芮督芮生乎腐蠶羊
肝化爲地臯馬血之爲轉燐也人血之爲野火也鷓之爲
鷓鷓之爲布穀布穀久復爲鷓也燕之爲蛤也田鼠之爲
鶉也朽瓜之爲魚也老韭之爲莧也老榆之爲猿也魚卵
之爲蟲直爰之獸自孕而生曰類河澤之鳥視而生曰鷓
純雌其名大罾純雄其名穉蜂思士不妻而感思女不夫
而孕后稷生乎巨跡伊尹生乎空桑厥昭生乎濕醯雞生
乎酒羊奚比乎不苟久竹生青寧青寧生程程生馬馬生
人人久入於機萬物出於機皆入於機

古微書卷二十九

古微書卷三十

孝經鉤命決

緯書以命言者莫如元苞以鉤言者莫如春秋之文耀
鉤河圖之稽耀鉤茲撰孝經緯則直言決矣殆卽元命
耀鉤之命而參其奧以示人也故以決名

天子爵稱也三皇步五帝趨三王馳五霸又三皇步五帝
驟三王馳五伯蹶七雄僵

按本注道隆德備日月爲之步時事彌順日月爲之驟勤
思不已日月乃馳

或稱帝王接上稱天子明以爵事天接下稱帝王明以號令
臣下

道機合者稱皇又帝受命握符出

說皆見前

孔子曰三皇設言民不違五帝畫象世順機三王肉刑揆漸

加應世黠巧姦偽多多音絃加音姬

三皇無文五帝畫象三王肉刑注曰畫象者上罪墨象赭衣雜屨中罪赭衣雜屨下罪雜

屨而已

按大戴盛德篇凡人民疾六畜疫五穀災者生於天天道不順生於明堂不飾故有天災則飾明堂也凡民之為姦邪竊盜歷法妄行者生於不足不足生於無度量也故有姦邪竊盜歷法妄行之獄則飾度量也凡不孝生於不仁愛也不仁愛生於喪祭之禮不明故有不孝之獄則飾喪

祭之禮凡弑上生於義不明故有弑獄則飾朝聘之禮也凡鬪辨生於相侵陵也相侵陵生於長幼無序而教以敬讓也故有鬪辨之獄則飾鄉飲酒之禮也凡淫亂生於男女無別夫婦無義故有淫亂之獄則飾昏禮享聘也故曰刑罰之所從生有源不務塞其源而務刑殺之是為民設陷以賊之也

又按尚書大傳曰決關梁踰城郭而略盜者其刑臏男女不以義交者其刑宮觸易君命革輿服制度姦軌盜攘傷人者其刑劓非事而事之出入不以道義而誦不詳之辭者其刑墨降畔寇賊劫略奪攘矯虔者其刑死此五刑之始也

唐堯五廟親廟四與始祖五禹四廟至子孫五殷五廟至子孫六周六廟至子孫七

說已見前

刑罰藏頌聲作鳳皇至麒麟應封泰山禪梁父

說已見前

華胥履跡怪生皇犧

跡靈威仰之跡也履跡而生以為奇怪也

任已感龍生帝魁

任已帝魁之母也魁神農名已或作似也

附寶出降大靈生帝軒

附寶帝軒母也黃精軒轅氣也

軒黃帝名附或作付也

命星貫昴修已夢接生禹

命使之星謂流星之星也

說已見前

舜即位巡省中河錄圖受文地在洛水傍方堯禪舜沈書曰稷而赤光起舜禪禹沈璧堯壇赤光又起及湯觀洛沈璧三

投光不起矣稷讀為側

禹時五星累累如貫珠炳炳若連璧

說已見前

堯夢乘青龍上泰山舜夢擊鼓桀夢黑風破其宮紂夢大雷擊其首

按東漢周宣夢書曰昔聖帝明王之時神氣昭然先見故

堯夢乘龍上泰山舜夢擊天鼓禹夢其手長湯夢布令天

下後皆有天下桀夢疾風壞其宮紂夢大雷擊其首齊桓

夢為大禽所中秦二世夢虎齧其馬王者夢之皆失天下

周禮太卜掌三夢之法一曰致夢二曰箚夢三曰咸陟其

經運十其別九十占夢掌以歲時占六夢之吉凶一曰正

夢二曰噩夢三曰思夢四曰寤夢五曰喜夢六曰懼夢
又靈樞經陰氣盛則夢涉大水而恐懼陽氣盛則夢大火
而燔炳陰陽俱盛則夢相殺上盛則夢飛下盛則夢墮甚
飢則夢取甚飽則夢予肝氣盛則夢怒肺氣盛則夢恐懼
哭泣飛揚心氣盛則夢善笑恐畏脾氣盛則夢歌樂身體
重不舉腎氣盛則夢腰脊兩解不屬凡此十二盛者至而
寫之立已厥氣客於心則夢見邱山烟火客于肺則夢飛
揚見金鐵之奇物客於肝則夢山林樹木客於脾則夢邱
陵大澤坵屋風雨客於腎則夢臨淵没居水中客于膀胱
則夢游行客于胃則夢飲食客於大腸則夢田野客於小
腸則夢聚邑衝衢客於膽則夢鬪訟自刳客於陰器則夢

接內客於項則夢斬首客於脛則夢行走而不能前及居
深地窳范中客于股肱則夢禮節拜起客於胞膂則夢洩
凡此十五不足者至而補之立已也及讀列子又有云凡
以浮虛為疾者則夢揚以沈實為疾者則夢溺籍帶而寢
則夢蛇飛鳥銜髮則夢飛將陰夢火將疾夢食飲酒者憂
歌舞者哭與此稍別

性者生之質若木性則仁金性則義火性則禮水性則智土
性則信也

情生於陰欲以時念也性生於陽以就理也陽氣者仁陰氣
者貪故情有利欲性有仁也

東夷之樂曰昧持矛助時生南夷之樂曰任持弓助時養西

夷之樂曰朱離持鉞助時殺北夷之樂曰禁持楯助時藏皆於四門之外右辟

按禮記疏東方謂之夷者風俗通云東方人好生萬物觝觸地而出夷者觝也其類有九一曰元菟二曰樂浪三曰高麗四曰蒲飾五曰鳧夷六曰索家七曰東屠八曰倭人九曰天鄙南方曰蠻者風俗通云君臣同川而浴極爲簡慢蠻者慢也其類有八一曰天竺二曰咳首三曰僬僥四曰跂踵五曰穿胸六曰儋耳七曰狗軹八曰旁春西方曰戎者風俗通云斬伐殺生不得其中戎者兇也其類有六一曰僥夷二曰戎夷三曰老白四曰耆羌五曰鼻息六曰天剛北方曰狄者風俗通云父子嫂叔同穴無別狄者辟

也其行邪辟其類有五一日月支二曰穢貊三曰匈奴四曰單于五曰白屋

賁居子曰凡夷狄而世雄長者類皆繫於神明之祚如槃弧之爲黃帝女也鬼方之爲陸終娶也勾吳祖周於越祖夏獯鬻亦祖夏禹而後世匈奴劉姓者皆祖漢室李姓者皆祖李陵夫皆有其自焉五季以下公主降夷夷女適中國蠻夷與中夏今昔又不同矣崔盧李鄭乎劉李張王乎此古人致謹于夷夏之防云其樂則難以

悉考

天子臨辟雍親袒而割牲尊三老之象也謁者奉几安車輓輪供綬執授

按禮記疏人君養老有四種一是養三老五更二是子孫
爲國難而死王養死者父祖三是養致仕之老四是引戶
校年養庶人之老有虞氏以燕禮者崔氏云燕者殺烝於
俎行一獻之禮坐而飲酒以至於醉夏后氏以饗禮者崔
氏云饗則體薦而不食爵盈而不飲依尊卑而爲獻取數
畢而已殷人以食禮者崔氏云不飲酒饗太牢以禮食之
殷人質素威儀簡少故養老以食禮周人修而兼用之者
備陰陽也凡飲養陽氣凡食養陰氣陽用春夏陰用秋冬
又云三老以象三光五更以象五辰熊氏云天子視學之
年養老一歲有七謂四時皆養也

仲尼牛脣舌理七重吐教陳機受度又仲尼虎掌是謂威射

胸應矩是謂儀古又仲尼龜脊又孔子海口言若含澤又夫

子輔喉又夫子駢齒象鉤星也

按伏無忌古今注云孔子生之夜有二蒼龍自天而下有
二神女擎香霧於空中以沐徵在先是五老列於庭前
則五星之精有麟吐玉書於闕里人家云水精之子繼商
周而素王出故蒼龍繞室五星降庭徵在知其爲異乃以
繡紱繫麟角而去至敬王末魯哀公十四年魯人鉏商田
於大澤得麟以示夫子夫子知命之終乃抱麟解紱而出
涕泗焉

孫氏曰抄曰相之不可憑也南史庾華傳華孫夔家富於
財食必列鼎又狀貌豐美頤頰開張人皆謂夔必爲方伯

及魏克江陵負以饑死時又有水軍都督褚蘿面甚尖危
從理入口竟保衣食而終唐柳渾十餘歲有巫告曰兒相
天且賤出家可免死渾不從仕至宰相魏朱建平善相鍾
繇以為唐舉許負何以復加然相王肅年踰七十位至三
公肅六十二終於中領軍南史徐陵八歲屬文十三通莊
老光宅寺慧雲法師每嗟陵蚤死陵仕至太子少傅年七
十七唐孔若思傳孔季詡擢制科授校書郎陳子昂嘗稱
其神清韻遠可比衛玠而季詡終左補闕世之以骨相繩
人抑何惑哉

孔子在庶德無所施功無所就志在春秋行在孝經又曰某
以匹夫徒步以制正法以春秋屬商以孝經屬參

孝經者篇題就號也所以表指括意序中書名出義見道曰

著成就也孝為一篇之目十八章也一字苞十八章為天地

喉襟道要德本故挺以題符篇冠就會子撰斯問曰孝文乎

駁不同何撰撰經異同也子曰吾作孝經以素王無爵之賞斧鉞之

誅故稱明王之道曾子辟席復坐子曰居吾語汝順孫以避

災禍與先王以託權託先王以為日至德要道以題行題行

子德行致羣瑞已行所及也首仲尼以立情性情性猶天地已不正為天

言子曰以開號開於受命也列曾子示撰輔使若得錄圖

以立之也佐與共治天下也矣書詩以合謀二人同心其利斷金同

按隋書孔子既敘六經題目不同指意差別恐斯道離散
故作孝經以總會之明其枝流雖分本萌于孝者也遭秦

焚書爲河間人顏芝所藏漢初芝子貞出之凡十八章而長孫氏博士江翁少府后蒼諫議大夫翼奉安昌侯張禹皆名其學又說文序建光元年許冲上父慎說文曰古文孝經孝昭帝時魯國三老所獻建武時議郎衛宏所校皆口傳官無其說臣父學孔氏古文撰具一篇并上

孝經中契

孔丘學孝經文成而天道立乃齋以白之天則元雲涌北極紫宮開北門角亢星北落司命天使書題號曰孝經篇目元神辰裔孔丘知元命使陽衢乘紫麟下告地主要道之君後年麟至口吐圖文北落郎服書魯端門隱形不見子夏往觀寫得十七字餘文二十消滅飛爲赤烏翔摩青雲

孝經右契

孔子夜夢豐沛之邦有赤烟氣起顏回子夏侶往觀之驅車到楚西北范氏之廟見芻兒捶麟傷其前折左足取薪而覆之孔子曰兒來汝姓爲誰曰吾姓爲赤松字時僑特名受紀孔子曰汝豈有所見乎曰吾所見一獸如麕者羊頭頭上有角其末有肉方以是西走孔子發薪下麟視孔子趨而往麟蒙其耳吐書三卷孔子精而讀之

孝經左契

將軍頤虎銜珠大夫正海出魚 封於泰山考績燔燎禪於梁父刻石紀號垂度示典功平政教

孝經威嬉拒

古微書卷三十一 孝經威嬉拒
欲去惡鬼須具五刑令五人皆持大斧著鐵兜鍪驅之常使去四五十步不可令近人也

按風俗通引黃帝書上古之時有荼與鬱壘昆弟二人性能執鬼度朔山上章桃樹下簡閱百鬼無道理妄爲人禍害荼與鬱壘縛以葦索執以食虎於是縣官常以臘除夕飾桃人垂葦菱畫虎於門皆追放於前事冀以衛凶也桃梗梗者更也歲終更始受介祉也

古微書卷三十一

古微書卷三十一

孝經內事圖

賁居子曰古人之學圖居左書居右圖植物也書動物也書爲經而圖爲緯也互相質也緯書之有圖惟易次則春秋蓋皆有儀物可記列耳孝經無儀物安得有圖蓋天象元隱非圖莫著而終以其言隱也名之內事云天子行孝德則景星見

按宋書符瑞志黃帝時有景雲之瑞有赤方氣與青方氣相連赤方中有兩星青方中有一星凡三星皆黃色以天清明時見於攝提名曰景星

王者動得天度止得地意從容中道陰陽合度則太微五帝

座星明以光也

按晉志太微天子庭也黃帝座在太微中黃帝座不明人主求賢士以輔法不然則奪勢

王者得禮之制不傷財不害民君臣和草木昆蟲各象正性則三台為齊明不闕不狹如其度宋均曰君臣制度宮室車旗多少各有科品則應也

按天官書魁下六星兩兩相比者名曰三能三能色齊君臣和不齊為乖戾晉志云起文昌列抵太微西近文昌二星曰上台為司命主壽次二星曰中台為司中主宗室東二星曰下台為司祿主兵又泰階六符經曰泰階者天子之三階上階上星為男主下星為女主中階上星為諸侯三公下星為卿大夫下階上星為士下星為庶人三階平

則陰陽和風雨時不平則稼穡不成冬雷夏霜

王者遠嫌別微殊貴賤抑驕臣息亂子則屏星為之明以潤帝座章而光宋均曰屏星五帝座明以潤章大也

按晉志屏四星在端門之內近右執法屏所以壅蔽帝庭也執法主刺舉臣尊敬君上則星光明潤澤

天子得靈臺之禮則五車均明河行不離其常宋均曰天子考察天氣若梓慎見星之視者也所以獲福禳災五車主五穀民禳災得福歲無飢寒之困五穀星之明以應之河若離常則有決溢之憂則五穀失所植矣

梓慎見星之視者也所以獲福禳災五車主五穀民禳災得福歲無飢寒之困五穀星之明以應之河若離常則有決溢之憂則五穀失所植矣

按晉志五車者五帝車舍也五帝座也主天子五兵一曰

主五穀豐耗西北大星曰天庫主太白金主秦次東北星曰

獄主辰星主燕趙次東星曰天倉主歲星主魯衛次東南

星曰司空主填星主楚次西南星曰卿星主熒惑主魏又
史記正義曰占五車三柱有變各以其國占之三柱入出
一月米貴三倍期二季出三月貴十倍一季柱入出不與

天倉相近軍出米貴轉粟千里

王者敬諸父有差則大角光明以揚宋均云諸父伯仲叔季也斗為帝車所乘也角

堅剛而居帝前帝敬諸父感天應之也

按天官書大角者天王帝廷正義曰大角一星在兩攝提
間人君之象也占其明盛黃潤則天下大同也

大角為坐候宋均曰坐帝坐也

昆弟有親親之恩則鉤鈐不離房一作入房鉤鈐遠房則疏闊今昆弟相親故天相近

明其友也

按晉志亢東咸西咸各四星在房星北房之戶所以防佚

淫也鍵閉一星在房東北鉤鈐主關鑰史記正義曰鉤鈐

兩星以閑防神府占明而近房天下同心鉤鈐房星之間

有客星出及踈折者皆地動之祥也亦曰地動河清

斗曲杓橈象成車房為龍馬華蓋覆鉤天罡八魁神不獨居

故驂駕陪乘以道踟躕宋注曰房星既體蒼龍又象駕駟馬故兼言之也覆鉤既覆且鉤曲似蓋

也天罡八魁又似御陪乘

按天官書斗為帝車運于中央臨制四鄉分陰陽建四時

均五行移節度定諸紀皆繫於斗宋均云是大帝乘車也

志云房為四表亦曰天駟為天馬主車駕南星曰左驂次

左服次右服次右驂亦曰天廄又主開閉為畜藏之所由

也 大帝上九星曰華蓋所以覆蔽大帝之坐也傳舍九星在華蓋上傳舍南河中五星曰造父其西河中九星如鉤狀曰鉤星直則地動 北落西南一星曰天綱主武帳北落東南九星曰八魁主張禽獸 王良五星在奎北居河中其四星曰天駟旁一星曰王良亦曰梁爲天橋主禦風雨水道道前一星曰策星若移在王良前居馬後是謂策馬則車騎滿野閣道六星在王良前飛道也從紫宮至河神所乘也

歲星守心則年穀豐鎮星合房符明道與太白合表四夷從服之象黃氣抱日輔臣納忠

按容齋隨筆曰世之伎術以五星論命者大率以火土爲惡故有晝忌火星夜忌土星之語土鎮星也行遲每至一宮則二歲四月乃去以故爲災最久然以國家論之則不然符堅欲南伐歲鎮守斗識者以爲不利史記天官書云五潢五帝車舍火入旱金兵水水宋均曰不言木土者德星不爲害也又云五星犯北落軍起火金水尤甚木土軍吉又云鎮星所居國吉未當居而居已去而復還居之其國得土若當居而不居旣已居之又西東去其國失其土居久其國福厚其居易福薄如此則鎮星乃爲大福德與木無異豈非國家休祥所繫非民庶可得侔耶失義不德白虎不出禁或逆枉矢射山崩日蝕天子失仁太白經天日食修岸山崩理惑

按禮記正義左傳昭三十一年十二月辛亥朔日有食之
庚午之日始有謫謫謂日之將食之氣氣見於上所以
責人君也梓慎曰二至二分日有食之不爲災也日月之
行也分同道也至相過也其他月則爲災陽不克也故常
爲水也然詩之十月則夏之八月秋分日食而爲災者以
辛卯之日卯往侵辛木反克金故爲災昭七年夏四月甲
辰朔日有食之而大咎衛君上卿四月夏之二月爲災者
以甲辰之日甲爲木辰爲土卯當克土今日食土反克木
故爲災也昭二十一年秋七月壬午朔而日食壬爲水午
爲火水應克火而日食火反克水不爲災者以秋七月夏
之五月是壬午之時得有克王之理故不得爲災

又按搜神記夏桀之時厲山亡秦始皇之時三山亡周顯
王三十二年宋大邱社亡漢昭帝之末陳留昌邑社亡京
房易傳曰山默然自移天下兵亂社稷亡也故會稽山陰
瑯琊中有怪山世傳本琅邪東武海中山也時天夜風雨
晦冥旦而見武山在焉百姓怪之因名曰怪山時東武縣
山亦一夕自亡去識其形者乃知其移來今怪山下見有
東武里蓋記山所自來以爲名也又交州脆州山移至青
州凡山徙皆不極之異也尚書金縢曰山徙者人君不用
道士賢者不與或祿去公室賞罰不由君私門成羣不救
當爲易世變號又曰日月薄蝕彗孛流飛此天地之危沴
也寒暑不時此天地之蒸否也石立土踊此天地之瘤贅

也山崩地陷此天地之癰疽也衝風暴雨此天地之奔氣也雨澤不降川瀆涸竭此天地之焦枯也

彗星出北斗兵大起在三台臣害君在太微君害臣在天獄諸侯作禍彗行所指其國大惡彗在日旁子欲殺父彗在月中者君有德天下欣心大豐盛

彗五彗也蒼則王侯破天子苦兵赤則賊起強國恣黃則女害色權奪於后妃白則將軍逆二季兵大作黑則水精賊河河決賊處處起

按前漢志歲星贏而東南石氏見彗星甘氏不出三月迺生彗本類星末類彗長二丈贏東北石氏見覺星甘氏不出三月迺生天棊本類星末銳長四尺縮西南石氏見棊

雲如牛甘氏不出三月迺生天槍左右銳長數丈縮西北石氏見槍雲如馬甘氏不出三月迺生天欒本類星末銳長數丈石氏槍欒棊彗異狀其殃一也必有破國危君伏死其辜餘殃不盡爲早凶饑暴疾至日行一尺出二十餘日迺入甘氏其國凶不可舉事用兵出而易所當之國是受其殃又曰妖星不出五年其下有軍及失地若國君喪按晉志有妖星二十一而無雜妖隋志所集則庾季才靈臺祕苑也且志有雜妖又有星雜變文獻通考錄其雜變而遺雜妖併集于後

雜妖一曰天鋒彗象矛鋒者也主從橫天下從橫則天鋒星見二曰燭星狀如太白其出也不行見則不久而滅燭

星所燭者城邑亂三曰蓬星狀如夜火之光在西南修數丈左右兌出而易處又曰蓬星狀如粉絮見則天下道術士當有出者布衣之士貴天下太平五穀成四曰長庚狀如一匹布著天見則兵起五曰四填出四隅去地六丈餘大而赤夜半時出見十月而兵起六曰地維藏光大而赤去地二三丈如月始出東北隅天下大水出東南隅大旱西南隅西北隅則兵大起以上亦見晉志七曰女帛變出東北水木氣合也有大喪八曰盜星出東南火木氣合也多寇賊九曰積陵出西北金水氣合也見則天下隕霜兵大起人飢十曰端星大而赤察之中黃數動長可四丈所出之氣効于四季名曰四隅所出兵大起十一曰昏昌出西北氣

青赤見則國易政先起者昌後起者亡高十丈亂一年高二十丈亂二年高三十丈亂三年十二曰莘星出西北狀有如環一星見則諸侯有失地十三曰白星有如星非星狀如削爪爲男喪十四曰菟昌出西北有青赤環之此星見則天下改易十五曰格澤狀如炎火上黃下白從地而上下大上銳見則不種而穫又曰此熒惑之變見則伏尸流血期三年十六曰歸邪狀如星非星如雲非雲見則必有歸國者十七曰濛星夜有赤氣如牙旗長短四面西南最多又曰刀星見則亂之象

星雜變一曰星晝見若星與日並出名曰嫁女星與日爭光武且弱文且強女子爲王二曰恒星不見主不嚴法度

古微書卷三十一
消又曰天子失政諸侯橫暴三曰星鬪天下大亂四曰星
搖人衆將勞五曰星隕陽失其位災害之萌又曰衆星墜
人失其所也又曰奔星之所墜其下有兵列宿之所墜滅
家邦衆星之所墜衆庶亡又曰填星墜海水佚黃星騁海
水躍

古微書卷三十一終

古微書卷三十二

河圖緯

賁居子曰緯候之興其生於河出圖一語乎自前漢世
有河圖九篇洛書六篇云自黃帝至周文王所受本文
又別三十篇云自初起至於孔子九聖增演以廣其意
蓋七緯之祖本也顧漢志馬鄭皆不道及惟梁崇文隋
經籍有二十卷今讀其文淵且豔也其錄則曰括地象
曰絳象曰始開圖皆以鉤山河之蹟曰帝覽嬉曰稽耀
鉤皆以挾星象之元曰挺佐輔曰握矩記皆以闡運歷
之要而又有帝通紀真紀鉤著命祕徵要元考耀殘篇
半牘錯海希珍遇之輒疏矣殆視諸緯爲富云

河圖括地象

昔禹治水得括地象此其傳之最古也

易有太極是生兩儀兩儀未分其氣混沌清濁既分伏者為天偃者為地又曰元氣無形洶洶隆隆偃者為地伏者為天

天地精通神明列序

元氣闔陽為天積精為日

天不足西北地不足東南西北為天門東南為地戶天門無

上地戶無下注天不足西北是天門地不足東南是地戶

天左動起于牽牛地右動起于畢

天有四表以布精魄地有四瀆以出圖書

天有五行地有五岳天有七星地有七表天有八氣地有八

風天有九道地有九州天有四維地有四瀆天有九部八紀

地有九州八柱

按淮南子東北為報德之維西南為背陽之維東南為常

羊之維西北為號通之維

天下九州內效中域以盡地化地中央曰崑崙崑崙東南

地方一萬五千里名曰神州中有五岳地圖帝王居之八

極之廣東西二億三萬三千里南北二億三萬一千五百里

夏禹所治四海內地東西二萬八千里南北二萬六千里有

君長之州有九阻中土之文德及而不治

崑崙之墟下通含右赤縣之州是為中則東南神州曰晨土

正南邛州曰深土西南戎州曰滔土正西弇州曰并土正中

冀州曰白土西北桂州曰肥土北方元州曰成土東北咸州
曰隱土正東揚州曰信土晨亦作農深一作沃白一作中元一作濟信一作申

按淮南子九州之外乃有八殞亦方千里自東北方曰大澤曰無通東方曰大渚曰少海東南方曰旻區曰元澤南方曰大夢曰浩澤西南方曰資渚曰丹澤西方曰九區曰泉澤西北方曰大夏曰海澤北方曰大冥曰寒澤凡八殞八澤之雲是雨九州八殞之外而有八紘亦方千里自東北方曰和邱曰荒土東方曰棘林曰桑野東南方曰大窮曰衆女南方曰都廣曰反戶西南方曰焦僥曰炎土西方曰金邱曰沃野西北方曰一目曰沙所北方曰積冰曰委羽凡八紘之氣是出寒暑以合八正必以風雨八紘之外

乃有八極自東北方曰方土之山曰蒼門東方曰東極之山曰開明之門東南方曰波母之山曰陽門南方曰南極之山曰暑門西南方曰編駒之山曰白門西方曰西極之山曰閭闔之門西北方曰不周之山曰幽都之門北方曰北極之山曰寒門凡八極之雲是雨天下八門之風是節寒暑八紘八殞八澤之雲以雨九州而和中土

賁居子曰昔聞神農之治地過日月之表此或神農之九州與蓋其說祖于鄒衍衍謂中國於天下乃八十一分之一耳中國外九州各有裨海環之如此者九乃有大瀛海環其外天地之際焉頗似佛說四天下及須彌山王三千大千之說而要其言以海為環則依然中夏

之習見也近世有利瑪竇自歐羅巴國越八萬里汎海而來其言海外大國猥多而西視神州目爲大明海居地才百之一則瀛海之外豈遂無方輿哉鄒子之言尚猶蠻觸也顧漢儒括地志全述其文而隋代郊祀至以九土列祀位亦可謂好大不經矣

凡天下有九區別有九州中國九州名赤縣神州卽禹之九州也上云九州八柱卽大九州也非禹貢赤縣小九州也崑崙山爲天柱氣上通天崑崙者地之中也地下有八柱柱廣十萬里有三千六百軸互相牽制名山大川孔穴相通

按關令內傳地厚萬里其下得大空大空四角下有自然金柱輒方員五千里

地南北三億二萬五千五百里地部之位起形高大者有崑崙山從廣萬里高萬一千里神物之所生聖仙之所集也出五色雲氣五色流水其白水東南流入中國名曰河也其山中應于天最居中八十城布繞之中國東南隅居其一分是奸城也崑崙之山爲地首上海鵬案一本作止爲握契滿爲四瀆橫爲地軸上爲天鎮立爲八極一本作柱

崑崙之墟有五城十二樓河水出焉四維多玉崑崙山有水水氣上蒸爲霞

崑崙有柱焉其高入天卽所謂天柱也圍三千里圓如削下有仙人九府治與天地同休息其柱銘曰崑崙銅柱其高入天圓周如削膚體美焉

按山海淮南怪談崑崙無異佛氏之侈須彌山也道家又以蓬萊爲崑崙茲不具述惟赤霆一經相傳爲張子房要其說地脈山原殊爲奧窔其文曰崑崙柱天萬脈繇起西北綿亘幽寒莫詣爲背爲項爲脊爲毳下爲鬣鬣上爲髮際面居秦雍耳目口鼻幽冀川蜀分左右背懸心關腦腹垂洛汭胃腕出納爲汧爲渭大河大江經絡榮衛大腸膀胱震澤壘濟青徐以降是爲髓髀泄爲尾閭茫茫無際海州萬國糞滓塵穢

嶓冢山上爲狼星武開山爲地門上爲天高星主圜荆山爲地雌上爲軒轅星大別爲地理天以合地以通三危山在鳥鼠之西南上爲天苑星岐山在崑崙東南爲地乳上爲天太行山天下之脊

三危山黑水出其南

岐山上多白金周之興也鸞鷲鳴于岐山時人亦謂岐山爲鳳凰堆

瀛州多積石其名曰昆吾鍊之成鐵以作劍光明如水晶石蓋鐵州也

嶓冢山上有異花草名骨容食之無子

《德布精上爲星河精上爲天漢

井絡纏曜江漢炳靈原流深遠盛爲四瀆之首

按張華叙神異經曰崑崙有銅柱焉其高入天所謂天柱也圍三千里員周如削下有迴屋仙人九府治上有大鳥名曰希有南向張左翼覆東王公右翼覆西王母背上小處無羽一萬九千里西王母歲登翼上之東王公也故其柱銘曰崑崙銅柱其高入天員周如削膚體美焉其鳥銘曰有鳥希有喙赤煌煌不鳴不食東覆東王公西覆西王母王母欲東登之自通陰陽相須唯會益工

河圖始開圖

漢武按古圖書始名河所出曰崑崙張騫未之見也唐薛元鼎使吐蕃得源于悶磨黎山中亦非其真勝元命

都實往求之朶甘思西部有泉百泓行二十日至朶甘思東北有大雪山始名崑崙則河源非崑崙明矣豈上古聖人亦有目力足踐所未及者乎失之古得之今失之中華得之夷戎學然後知不足也

黃帝問風后曰余欲知河之始開風后曰河凡有五皆始乎崑崙之墟

黃河出崑崙東北角剛山東以北流千里折西而行至蒲山南流千里至文山東流千里至秦澤西流千里至潘澤陵門東北流千里至華山之陰東流千里至于植雍南流千里至於下津然河水九曲其長九千里入于渤海

水經注黃河百
里一小曲千里

一曲
一直

崑崙山北地轉下三千六百里有八元幽都方二十萬里地
下有四柱廣十萬里地有三千六百軸犬牙相舉海鵬案舉字一作錯
按十三洲說崑崙山正在西海之戌地北海之亥地去岸
十三萬里有弱水周迴繞匝山南控積石圃西北接北戶
之室東北臨大活之井西南至承淵之谷此四角大山實
崑崙之支輔也積石圃南頭昔西王母告周穆王去咸陽
三十六萬里山高平去地三萬六千里上有三角面方廣
萬里形如偃蓋上有金臺玉闕亦元氣之所合天帝君所
治處也 閱此說則穆天子傳之崑崙卽水經所謂高一
萬一千里者而山海之崑崙止云廣八百里當別一小崑
崙矣

黃泉之埃上爲黃雲青泉之埃上爲青雲赤泉之埃上爲赤
雲白泉之埃上爲白雲元泉之埃上爲元雲

此卽淮南子正土御埃天之說

九州殊題水泉剛柔各異青徐角羽集覽舒遲人聲緩其泉
鹹以酸荆揚角徵會氣漂輕人聲急其泉酸以苦梁州商徵
接剛勇漂人聲騫其泉苦以辛兗豫宮徵合平靜有慮人聲
端其泉甘以苦雍冀合商羽端駛烈人聲捷其泉辛以鹹
按管子夫齊之水道躁而復故其民貪麤而好勇楚之水
淖弱而精故其民輕果而賊越之水濁重而泊故其民愚
疾而垢秦之水泔最而稽淤滯而雜故其民貪戾罔而好
事晉之水枯旱而運淤滯而雜故其民諂諛而葆詐巧佞

而好利燕之水萃下而弱沈滯而壅故其民愚戇而好貞
輕疾而易死宋之水輕勁而清故其民簡易而好正

淮南子汾水濛濁而宜麻濟水通和而宜麥河水濁而
宜菽雒水輕利而宜禾渭水多力而宜黍漢水重安而宜
竹江水肥仁而宜稻平土之人慧而宜五穀 夫水味之
別則然矣論其極則庭州灞水金鐵皆漏鄜延之川白脂
日流弱水溺毛黑溪元曠悉唐制角畔怯腐手水性不同
有如此者其說曰庭州灞水在大荒之外金鐵承之皆漏
惟角與瓠葉則否拘夷山中有流水亦如之鄜延卽延安
石油也以爲烟墨松脂不及詳注石燭黑溪在南荒以其
水塗石象至輒不去昆侖以此塗身卽能乘象如家畜古
所謂黑昆侖今之象奴也悉唐畔怯見佛書中
賁居子曰水一耳泉何以品乎聲何以析乎則本草之
辨水其濫爾乎蒲元之驗涪水雜以二斗亦知其非蜀
江張茂先之察江心問洛中篙師一皆首服但不識桑
苧翁從此會否張又新品水抑又亞之

河圖絳象

僧一行曰天下山川存乎兩戒北紀河源南紀江源然
而河獨與雲漢相始終歷歷其所流所直莫非星也故
河有圖江不聞焉有天下者保河則強塹江則弱

河導崑崙山名地首上爲權勢星一曲也東流千里至規其
山名地契上爲距樓星二曲也祁南一作北流千里至積石山名

地肩上爲別符星三曲也邠南千里入隴首山間抵龍門首
名地根上爲營室星四曲也龍門上爲王良星爲天橋神馬
出河躍南流千里抵龍首至卷重山名地咽上爲卷舌星五
曲也東流貫砥柱觸閼流山名地喉上爲樞星以運七政六
曲也西距卷重山千里東至雒會名地神上爲紀星七曲也
東流至大伾山名地肱上爲輔星八曲也東流至絳水千里
至大陸名地腹上爲虛星九曲也

按河水發源有土蠻星宿海之說故緯書按天星以名其
流要之上爲星辰下爲河漢凡江淮之瀆無不與星辰應
也

黃河出崑崙東北流千里折西而行至於蒲山南流千里至
於華山之陰東流千里至於桓雍北流千里至於下津河水
九曲長九千里入於渤海

此文已見始開圖而語少畧因楊用修引爲絳象故錄于
此

邠之隘上爲扶桑日所升宣陸之阻上爲吳泉月所登

按山海經紀日月之出者七日月所入五日月所出入一
其紀日月之出也曰大言山曰合虛山曰明星山曰鞠陵
山曰湯谷扶水曰猗天蘇門山曰壑明俊疾山皆在大荒
東經其紀日月之入曰豐沮玉門山曰日月山天樞也曰
鑿鑿鉅山曰常陽山曰大荒山皆在大荒西經曰浴日一
在大荒南經之甘淵曰浴月一在大荒西經之元丹山其

紀日月所出入一在大荒西經之方山柜格之松焉考之淮南子曰所出入又多不同存而不論亦可也

太湖中洞庭山林屋洞天卽禹藏真文之所一名包山吳王闔閭登包山之上命龍威丈人入包山得書一卷凡一百七十四字而還吳王不識使問仲尼詭云赤烏銜書以授王仲尼曰昔吾遊西海之上聞童謠曰吳王出遊觀震湖龍威丈人名隱居北上包山入靈墟乃造洞庭竊禹書天帝大文不可舒此文長傳六百初今強取出喪國廬丘按謠言乃龍威丈人洞中得之赤烏所銜非丘所知也吳王懼乃復歸其書按靈寶要畧昔太上以靈寶五篇真文以授帝嚳帝嚳將仙封之於鍾山至夏禹巡狩度弱水登鍾山遂得是文後

復封之包山洞庭之室吳王闔閭出遊包山見一人自言姓山名隱居闔閭叩之乃入洞庭取素書一卷呈闔閭其文不可識令人齋之問孔子孔子曰丘聞之童謠云吳王出遊觀震湖龍威丈人山隱居北上包山入靈墟乃入洞庭竊禹書天地大文不可舒此文長傳百六初若強取出喪國廬闔閭乃尊事之

越絕書禹治洪水至牧德之山見神人焉謂禹曰勞子之形役子之慮以治洪水無乃怠乎禹知其神人再拜請誨神人曰我有靈寶五符以役蛟龍水豹子能得之不日而就因授禹而誡之曰事畢可祕之於靈山禹成功後乃藏之于洞庭包山之穴至吳王闔閭之時有龍威丈人得符

獻之吳王以示羣臣皆莫能識乃令齋符以問孔子孔子曰昔禹治水于牧德之山遇神人授以靈寶五符後藏於洞庭之包山君王所得無乃是乎赤鳥之事某所未詳使者反白闔閭乃尊事之先是江左童謠云禹治洪水得五符藏之洞庭包山湖龍威丈人竊禹書得五符者喪國廬尋而吳果滅

孔子入吳信有之包山之謠亦必有自而第三云靈寶五符則或出附會者之口也

古微書卷三十二

古微書卷三十三

河圖稽耀鉤

稽耀曰鉤以言乎元象之窈裔無不覩也

五星散爲五色之彗 歲星之精流爲國皇主內難 太白

散爲天狗主候兵 辰星散爲枉矢流枉矢所射可誅

熒惑散爲蚩尤旗主惑亂 填星散爲獄漢又爲五殘主奔

亡又爲旬始主招橫又爲虹蜺主內淫八霓者氣也起在月

側其色青赤白黃 歲星之精流爲天棊天槍天猾天衝國

皇及登蒼彗熒惑散爲昭旦蚩尤之旗昭明司尤天櫬赤彗

填星散爲五殘獄漢大賁昭星絀流旬始蚩尤虹蜺擊咎黃

彗太白散爲天杵天柎伏靈大敗司姦天狗天殘卒起白彗

辰星散爲枉矢破女拂樞滅寶繞經驚理大奮祀黑彗五色之彗各有長短曲折應象

日月兩重暈者饑之祥也

蟾蜍去月天下大亂

月犯房天子有憂四足之蟲多死月犯心後星亂臣在旁

青雲刺月五穀不熟旁多赤雲如人頭大戰月旁有白雲如

杵者三貫月六十日內有兵戰月始出有黑雲貫名激雲不

出三日大雨

彗星出貫奎庫兵悉出禍在強侯外夷胡應逆首謀也枉矢

東流天下恐

按晉史志妖星二十有一一日彗星二曰孛星三曰天棓

四曰天槍五曰天欒六曰蚩尤旗七曰天衝八曰國皇九

曰昭明十月司危十一曰天讒十二曰五殘十三曰六賊

十四曰獄漢十五曰旬始十六曰天鋒十七曰燭星十八

曰蓬星十九曰長庚二十曰四填星二十一曰地維藏光

賁居子曰天棓天槍皆紫垣門內之宿似不得爲妖女

孛本黃帝時一女子修行不得其死蚩尤則黃帝所誅

者而復能爲妖于天亦可詫也

又按晉志流星之類有音如炬火天保也所墜國有喜若

小流星青赤名地鴈所墜有兵其光青赤長三丈名天鴈

軍中之精華也其飛星大若缶若甕後皎然白前卑後高

此謂頓頓多死亡或大若缶甕星滅後白者曲環如車輪

古微書卷三十三
此謂解御其國人相斬爲爵祿飛星如前白者化爲車輪
下名曰大滑下有流血又云東南有三星出名曰盜星出
則天下有大盜西南有三大星出名曰種陵出則天下穀
貴十倍西北三大星出而白名天狗出則人相食大凶東
北有三大星出名曰女帛見則有大喪

黃黑氣掩日是爲日薄凡日食皆於晦朔有不於晦朔者爲
日薄雖非日月同宿時陰氣盛掩日光也占類日食

月犯心有亂臣王者惡之又宮中有亂又有大喪犯中星爲
人主犯前星爲太子犯後星爲庶子當之

河圖帝覽嬉

猶云覽德輝而嬉悅爾

黃道一青道二出黃道東赤道二出黃道南白道二出黃道
西黑道二出黃道北日春東從青道夏南從赤道秋西從白
道冬北從黑道立春星辰西遊日則東遊立夏星辰北遊日
則南遊春分星辰西遊之極日東遊之極日與星辰相去三
萬里夏至則星辰北遊之極日南遊之極日與星辰相去三
萬里立秋星辰東遊日則西遊立冬星辰南遊日則北遊秋
分星辰東遊之極日西遊之極冬至星辰南遊之極日北遊
之極相去各三萬里

按漢志日有中道月有九行中道者黃道一曰光道光道
夏至北至于東井北近極故晷短冬至南至于牽牛遠極
故晷長春秋分日東至角西至婁去極中而晷中日行不

可指而知也故以二至二分之星爲候日東行星西轉冬至昏奎八度中夏至氏十三度中春分柳一度中秋分牽牛三度七分中此其正行也日行疾則星西轉疾事勢然也

又按隋志日循黃道東行行東陸謂之春行南陸謂之夏行西陸謂之秋行北陸謂之冬

又中興天文志占天之法以二十八宿爲綱維分列四方南北去極各九十有一度冬則南遊春分星辰西遊之極三十有六度一星辰相去三萬里夏至則星辰北遊半在赤道內半在赤道外出入內遠極遠者皆二十有四度以其行赤道之中者名之曰黃道凡五緯皆隨日繇黃道行

惟月之行有九道四時交會歸於黃道而轉變焉故有赤青白黑四者之異名然唐志又云黃道春分與赤道交於奎秋分交於軫西南至斗北至井與漢志殊蓋赤道分天之半今古不易黃道本無定體因日行而爲之名日之行也每歲有差古今所以不同也

月未當望而望是謂從兵宜攻他人月當望而不望攻他人者有殃所宿之國亡地

月暈而珥六十日兵起不暈而珥全有喜兵在外而喜月不暈有四珥者臣有謀不成月暈三重天下受兵赤雲貫之其下亡地月暈四重其下亡國凶月暈六重其下亡國月暈九重其下兵起流亡五月中暈有九重以上者道上有熱死人

古微書卷三十三
地將動月犯太白其野受兵戰不勝又云所守之國兵起月
暈太白與日共其分主憂星出月陰負海國勝列星貫月陰
國可伐

大星流入月中無光有兵死又曰使星八月主失其地若星
入月中無光將戮

彗星在月胡兵大起

彗出東方河逆決將相有謀

月食從上始謂之失國國君當之從旁始謂之失令相當之
從下始謂之失律將軍當之

從上下始謂之赤子失其陰爲女其陽爲男
月行南河兵旱並起男子喪

月犯太白強侯作亂以戰不勝

月暈辰星春夏民有寒熱疾秋兵起冬其下並憂

月犯南斗兵起中國

月犯心有亂臣王者惡之又曰宮中有亂

月暈冒民多腹疾貴臣死若熒惑在胃中則有兵歲令在暈
中有德令火入太微中留止爲兵火起

河圖挺佐輔

此其符命之祖乎河洛易緯各載此事而文不一則雖
無其文未必無其事也

伏羲禪於伯牛鑽木作火

黃帝修德立義天下大治乃召天老而問焉余夢見兩龍挺

白圖卽帝以授余於河之都覺昧素善不知其理敢問於子
天老曰河出龍圖雒出龜書紀帝錄列聖人之姓號與謀治
平然後鳳凰處之今鳳凰以下三百六十日矣古之圖紀天
其授帝圖乎試齋以往視之黃帝乃祓齋七日衣黃衣冠黃
冕駕黃龍之乘戴蛟龍之旗天老五聖皆從以遊河洛之間
求所夢見之者弗得至於翠嬀之淵大鱸魚折溜而至乃問
天老曰子見夫中河折溜海鵬案折溜一本作沂流者乎曰見之顧問五
聖皆曰莫見乃辭左右獨與天老跪而迎之魚汎白圖蘭葉
朱文五色畢具天老以授黃帝舒視之名曰錄圖

錄圖曰渾渾噶噶婪婪雉雉萬物盡化

天授元始建帝號黃龍負圖鱗甲成字從河中出付黃帝令
侍臣目寫以示天下

黃帝遊於洛見鯉魚長三丈

海鵬案三丈一本作二丈

青身無鱗赤文成

字

堯時與羣臣賢智到翠嬀之川大龜負圖來投堯堯勅臣下
寫取告瑞應寫畢歸還水中

舜以太尉卽位與三公臨河觀黃龍五采負圖出置舜前以
黃玉爲柙白玉爲檢黃金爲繩黃芝爲泥章曰天黃帝符璽
又曰黃龍從雒水出詣虞舜鱗甲成字舜令寫之寫畢竟去

舜以土德故

一作文竟龍去

禹治水功大天帝以寶文大字賜禹佩渡北海兔弱水之難
自此百世之後地高天下山陵消去不風不雨不寒不暑民

復食土皆知其母不知其父如此千歲之後而天可倚杵洵
洵隆隆曾莫知其始終

按正法經天圓十二綱地方十二紀天綱運闕三百六十
輪爲一周地紀推機三百三十輪爲一度天運三千六百
周爲陽勃地轉三千三百度爲陰蝕天氣極於太陰地氣
窮於太陽故陽激則勃陰否則蝕陰陽勃蝕天地氣反天
地氣反乃謂之小劫天運九千九百周爲陽蝕地轉九千
三百度爲陰勃陽蝕則氣窮於太陰陰勃則氣極於太陽
故陰否則蝕陽激則勃陰陽蝕勃則天地改易天地改易
謂之大劫

運度經云靈寶自然運度有大陽九六百六也小陽九小
百六也三千三百年爲小陽九小百六也九千九百年爲
大陽九六百六也夫天厄謂之陽九也地虧謂之百六也
至金天氏之後甲申之歲是其天地運度否泰所終陽九
百六會至時道德方明兇醜頓肆聖君受任於王辰之年
也

皇氏譜錄曰自三象明曜已來至以累億劫會天地成敗
非可勝載數極唐堯是爲小劫丁亥之後甲申之年陽九
百六二氣離合王辰之始數有九周至庚子之年赤星見
於東方白搏見於月窟唐堯之後四十六丁亥是三劫之
周又五十五丁亥至王辰癸巳是大劫之周也六合冥一
二道盈虧時運周劫始轉一仙階

賁居子曰陽九百六之說僅見於道藏故備志之康節先生妄以十二時分元會運世而以堯舜世為已中宋受命遂當申初恐天地之大終難以年代限也

河圖握矩記 一作矩起

五運三正安有常期謂之握矩者明乎皇帝王之迭興各有禎符若春規夏準秋矩冬權可象鑑而不謬也

燧人之世大迹在雷澤華胥履之而生伏羲 一云伏羲在亥得人定之時

伏羲禪於伯牛鑽木作火

黃帝名軒北斗黃神之精母地祇之女附寶之郊野大電繞樞斗星耀感附寶生軒轅 又附寶之郊見電

繞斗軒星照郊野感而生軒 又黃帝母曰地祇之子名附寶

之郊野大電繞北斗樞星耀感附寶生軒轅

令訾野中有玉虎晨鳴雷聲聖人感期而興 又黃帝以雷精起玉虎晨鳴雷聲也

大星如虹下流華渚女節意感生白帝朱宣 朱宣少 瑤光之

星如虹貫月正白感女樞於幽房之宮生黑帝顓頊首戴干

戈有德文 又曰帝乾荒擢首而謹耳豸喙而渠股是襲若水

取蜀山氏曰樞是為河女所謂淖子也淖子感瑤光於幽房而生顓頊

扶都見白氣貫星感生黑帝湯

姜嫄履大人之跡生后稷太妣夢大人死而生文王

賁居子曰天之生奇杰瑰偉如其生怪石生妖禽偶感
異氣而出或于中夏或于蠻荒或爲尤物或爲英人亦
不計其爲帝爲王也如哀牢之觸沈木夜郎之流竹孔
廩君之涌土穴徐偃之生鰥孕或不繇血氣不經人道
咸自卓然何必爲天下主而後有奇徵哉且如桓靈寶
之么麼而當其母誕時亦感星墜銅盆吞之有娠使其
後竟受僞命豈不與瑤光慧苴同一瑞也然亦有漠然
無瑞而爲世雄霸者矣意者天之間氣其偶然而集而
不可以概世類乎若曰天知有帝王而福之則佛說萬
八千天子恐不勝其休祥之煩

少昊秀外龍庭日月縣通頤顙項渠頭併幹通眉帶午帝
齟齬方頤龐顛珠庭化齒戴干本帝嚳齟齬上法日參秉
度成紀以理陰陽

蒼帝方面赤帝圓面白帝廣面黑帝深面黃帝廣頭龍額

黃帝兌頤黑帝修頸蒼帝並乳

黃帝望之大視之博白帝望之明視之義

風后曰予告汝帝之五旗東方法青龍曰旗南方法赤鳥曰
旗西方法白虎曰典北方法元蛇曰旂中央法黃龍曰常
帝命伯禹曰告汝九術五勝之常可以克之汝能從之汝師
徒將興

黃帝曰凡人生一日天帝賜算三萬六千又賜紀二千聖人
得三萬六千七百二十凡人得三萬六千一紀主一歲聖人

加七百二十

孝順二親得算二千天司錄所表事賜算中功

按太上感應篇天地有司過之神依人所犯輕重以奪人算算減則貧耗算盡則死又有三台北斗神君在人頭上錄人罪惡奪其紀算大則奪紀小則奪算人生而不自愛者其亦負上帝之賜多矣

黃金千歲生黃龍青金千歲生青龍赤金千歲生赤龍白金千歲生白龍元金千歲生元龍

此即淮南子五龍五瀆之說已錄前運斗樞篇

黃帝生先致白狐

秦距之帝名政虎口日角大目隆鼻長八尺六寸身大七圍

手握兵執矢

怪曰勇敢重瞳天雨刀於楚之邦

宋均曰謂項羽

帝劉季日角戴勝斗胸龜背龍眼長七尺八寸明聖而寬仁

好生主軫劉受紀昌光出軫五星聚井

河圖雜緯篇

河圖祕徵

帝貪則政暴而吏酷酷則誅深深必殺主蝗蟲

主急妄怒失陽事則天無雲而雨

黃帝起大蚓見

帝失德政不平則月生足又陪臣擅命群下附和則月舉足

垂爪

河圖帝通紀

雲者天地之本也雨者天地之施也風者天地之使也雷者天之鼓彗星者天之旗

河圖著命

瑤光之星如虹貫月正白感女樞於幽房之宮生黑帝顓頊握登見大虹意感生舜於姚墟 修己見流星意感生帝戎文禹一名文命 扶都見白氣貫日意感生黑帝子湯 太姪夢長人意感生文王

河圖真紀鈞

王者封泰山禪梁父易姓奉度繼典崇功者七十有二君

河圖要元篇

句金之壇其間有陵兵病不起洪波不登又曰乃有地脈土

良水清句曲之山金壇之陵可以度世上昇曲城要元篇蓋

後漢書志註不載其目今見茅山志

河圖考靈曜一作考曜文

秦王政以白璧沈河有黑頭公從河出謂政曰祖龍來授天寶開中有尺二玉牘

高皇攝政總萬廷四海歸詠理威明文德道化承天精元祚興隆協聖靈

河圖提劉篇

帝季日角戴勝斗胸龜背龍眼長七尺八寸明聖寬仁好士主軫

古微書卷三十三

河圖雜緯篇

上

河圖稽命徵

帝劉卽位百七十年太陰在庚辰江充詭其變天鳴地坼

河圖會昌符

漢大興之道在九代之王封於太山刻石著紀禪於梁父退省考功

河圖曰漢高祖親祀汶水見一黃金却驚反化爲一翁責言劉季何不受河圖

河圖龍文曰鎮星光明八方歸德 赤九會昌十世以光十
一以興 九名之世帝行德封刻政

古微書卷三十三

古微書卷三十四

河圖玉版

緯之說兆于河圖故僭河圖者益衆而濫河圖者益陋
索之緯錄未聞有玉版者類書徵集顧有數條或亦其
流沿之舊與

倉頡爲帝南巡狩登陽虛之山臨于元扈洛汭之水靈龜負
書丹甲青文以授之帝文捉二十八字景刻于陽虛之石室
李斯止識八字曰上天垂命皇辟迭王今已不可尋矣

按金陵志注云昔周初有於倉頡墓下得石刻藏之書府
至秦李斯辨其八字云上天作命皇辟迭王或云叔孫通
識十一字而不傳妄也任昉云周人不能辨而斯通識之

余不信也詳考二句乃寇謙所纂黑帝安和國王禁文也
湘夫人者帝堯女也秦始皇王浮江至湘山逢大雨而問博士
湘君何神博士曰聞之堯二女舜妃也死而葬此

按禮記舜南巡狩蓋三妃未之從也郭璞注山海經云明
妃后生不從征死不從葬義可知也列女傳二女死於江
湘之間又楚辭有湘君湘夫人遂比之慮妃洛神名實相
亂矣及閱禮記所注三妃者謂宵明燭光癸比不謂娥英
也山海北經又云舜妻登比氏生宵明燭光處河大澤二
女之靈能照此所方百里則曲禮之三妃抑何其誣總之
好古尊聖者務侈其說而遂以爲聖人之眷屬皆系神靈
其實皆無可指耳

禹平治天下會諸侯會稽之野防風氏後到殺之夏德之盛
二龍降之禹使范成光御之行域外旣周而還至南海經防
風防風之神二臣以塗山之戮見禹使怒而射之迅雷風雨
二龍昇去二臣恐以刃自貫其心而死禹哀之乃拔其刃療
以不死之草是爲穿胸民

古越俗祭防風神奏防風古樂截竹長三尺吹之如嗥三人
披髮而舞

左傳文公十一年鄭瞞侵齊叔孫得臣獲長狄僑如注云
鄭瞞漆姓北方長狄也在夏爲防風氏殷爲汪芒氏

賁居子曰今之北狄幸而無是種也神哉大禹蓋亦慮
後世而震赫其武與

從崑崙以北九萬里得龍伯國人長三十丈生萬八千歲而死從崑崙以東得大秦國人長十丈皆衣帛從此以東十萬里得桃人國長三十丈五尺從此以東十萬里得中秦國人長一丈大秦人民亦壽萬八千歲不知田作但食沙石子按山海經大人國在蹇邱北爲人大坐而削船又東海之外有波谷山有大人之國有大人之市名曰大人之堂有一大人踐其上張其兩耳郭璞注秦時大人見臨洮身長五丈腳跡六尺埤雅東南有人長七丈名曰尺郭一曰黃父西地有人長二千里名無路西南荒有人長尺名先通東南荒有人長千里名朴父天竺車隣之國男女皆丈八尺大秦國人丈五尺

黃居子曰列子所稱龍伯巨人七萬里不盈數步蓋亦有之而防風之身橫九畝眉見于軾鰲陂之木矢鐵鏃長六尺有半又特其眇小者爾又王莽時奇士巨毋霸長一丈大十圍本出于蓬萊魏咸熙大人見襄武長二丈腳跡三尺二寸苻健皇始四年有長人身長五丈是月霖雨河渭汎溢中流得大屐一隻長七尺三寸屐指長尺餘而神異經則云西北海外有人焉長二千里兩脚中間相去千里腹圍一千六百里俱日飲天酒五斗張華注曰天酒甘露也不食五穀魚肉唯飲酒好遊山海間不犯百姓不干萬物與天地同生名無路之人天地之大故應無所不有耳

少室山其上有白玉膏一服即仙矣
芝草橫生或如車馬或如龍蛇之狀

按抱朴子五芝有石芝木芝草芝肉芝菌芝各有名品而
肉芝則萬歲蟾蜍千歲蝙蝠靈龜風生獸千歲鸞菌芝狀
如宮室或車馬或龍虎或飛鳥或人形五色無常已上服
之皆長生

龍魚河圖

河圖篇目已蕪矣類書所錄復有以龍魚命者豈非以
其玉石雜糅椒艾紛汨而衍其牘與要其文字亦雅俚
相乘政不必棄

月有九行赤道二出黃道南黑道二出黃道北白道二出黃
道西青道二出黃道東併黃道為九行立春春分月從東青
道立秋秋分從西白道立夏夏至從南赤道立冬冬至從北
黑道天有四表月有三道聖人知之可以延年益壽

按渾天說日道居中月五星循左右而行故日道獨謂之
黃月行青朱白黑道各兼黃道而言故又謂之九道也是
故月道出入於黃道其最遠者去黃道六度月行黃道之
內曰陰歷行黃道之外曰陽歷北為內南為外月行黃道
之南謂之朱道行黃道之北謂之黑道黃道之東謂之青
道黃道之西謂之白道黃道內外各四并黃道為九日月
之行有遲有速難以一術御也故因其合散分為數段
每段以一色名之欲以別算位而已

天歲星主德慶其精下爲天社之神天太白星主兵凶其精下爲雨師之神天熒惑星主司非其精下爲風伯之神天辰星主氣司災其精下爲先農之神天鎮星主得土之慶其精下爲靈星之神

按晉志凡五星盈縮失位其精降于地爲人歲星降爲貴臣熒惑降爲童兒歌謠嬉戲填星降爲老人婦女太白降爲壯夫處於林麓辰星降爲婦人吉凶之應隨其象告

天之東西南北極各有銅頭鐵額兵長三千萬丈三千億萬人天之東西南北極各有金剛敢死力士長三千萬丈三千億萬人天中太平之都有都甲食鬼鐵面兵長三千萬丈三千億萬人 崑崙山天中柱也

按依順正理論云三十三天迷盧山頂其頂四面各二十千若據周迴數成八萬有餘師說面各八十千與下際四邊其量無別山頂四角各有一峯其高廣量各有五百里有藥叉神名金剛手於中止住守護諸天於山頂中有宮名善見面二千半周萬踰繕那金城量高一踰繕那半其地平坦亦真金所成俱用百億雜寶嚴飾地觸柔軟如如羅綿於踐躡時隨足高下是天帝釋所都大城城有千門嚴飾壯麗門有五百青衣藥叉勇健端嚴長一踰繕那量各嚴鎧杖防守城門於其城中有殊勝殿種種妙寶具足莊嚴映蔽天宮故名殊勝面二百五十踰繕那周千踰善那是謂城中諸可愛事城外四面四苑莊嚴是彼諸天共

遊戲處一衆車苑謂此苑中隨天福力種種畢現三麤惡苑天欲戰時隨其所須甲杖等現三雜林苑諸天人中所玩皆同俱生勝喜四喜林苑極妙欲塵雜類俱臻歷觀無厭如是四苑形皆異方方周千踰繕那量居各有一如意池池面各五十踰繕那量各功德水彌滿其中隨欲四苑花鳥香林莊飾業果差別難可思議天福城外西南角有大善法堂三十三天時集辨論制伏阿素洛等如法事賁居子曰諸天之淨也元也而四隅八極猶各有威神以護其居陽之防陰如是其亟也有天下者守在四夷奈何其不豫

東方太山君神姓圓名常龍南方衡山君神姓丹名靈峙西

方華山君神姓浩名鬱狩北方恒山君神姓登名僧中央嵩山君神姓軍壽名逸羣呼之令人不病

東方太山將軍姓唐名臣南方霍山將軍姓朱名丹西嶽華

陰海鵬案太平御覽作華陽將軍姓鄒名尚北嶽恒山將軍姓莫名惠中

嶽嵩高山將軍姓石名元恒存之卻百邪

東海君姓馮名修青夫人姓朱名隱娥南海君姓視名口赤夫人姓翳名逸寥西海君姓勾大名邱白夫人姓靈名素簡北海君姓禹名帳里夫人姓結名連翹河伯姓呂名公子夫人姓馮名夷君有四海河神名竝可請之呼之却鬼氣

按雲笈七籤東嶽姓元丘名目陸南嶽姓爛名洋無西嶽姓浩嶽名元倉北嶽姓伏名通萌中嶽姓角名晉生句芒

號曰文始洪崖先生東方蒼帝東海君也祝融號曰赤精
成子南方赤帝南海君也蓐收號曰夏里黃公西方白帝
西海君也禺疆號曰冥元子昌北方黑帝北海君也風伯
神名吒號曰長育雨師神名馮修號曰樹德馮夷號曰元
梁使者

養生雜書曰東海姓何名歸君南海姓劉名漱君北海姓
吳名禽強君東海神名阿明南海祝融西海臣乘北海禺
強

廣雅山神謂之離河伯謂之馮夷江神謂之奇相物神謂
之鬼土神謂之羶羊水神謂之四鳥木神謂之畢方火神
謂之游光金神謂之清明

賁居子曰神豈有姓若字哉借有之孰相呼之且如天
劉翁下降而張翁竄竊騎其龍以上則今之天翁已非
昔天翁矣千億萬年仙神亦應乘除卽欲執書策之名
而呼之恐不應也好異者鉤探亦苦聊以博聞其實名
類猥多不勝舉耳

髮神名壽長耳神名嬌女目神名珠映鼻神名勇盧齒神名
丹朱夜臥呼之有患呼之九過惡鬼自却

按黃庭經曰髮神蒼華字太元腦神精根字泥丸眼神明
上字英元鼻神玉壘字靈堅耳神空閒字幽田舌神通金
字正倫齒神鰲鋒字羅干一面之神宗泥丸又心神丹元
字守靈牙神皓華字虛成肝神龍烟字含明腎神元冥字

古微書卷三十四
育嬰脾神嘗在字魂停膽神龍曜字威明皆在心內運天
經晝夜存之自長生

西陽雜俎身神及諸神名異者腦神曰覺元髮神曰元華
目神曰虛監鼻神曰沖龍玉舌神曰始梁讀白骸神名可
以思養生主矣

劍神名飛揚矛神名天矢陰弓神名曲張斧神名在章盾神
名自障

按埤雅粟曰許給豆曰靈殖黍曰俯佞曲張弓也推亡遠
望弩也續長箭也脫光刀也飛揚劍也狂章斧也馮耳孟
公船神也黃父漸耳食鬼之神也其貴神之異名又曰五
岳神泰曰圓常龍衡曰丹靈峙華曰浩鬱狩恒曰登僧嵩

曰軍壽逸羣四海神東曰馮修青南曰視赤西曰句火邱
百北曰禹帳里江神曰奇相河伯曰冰夷淮神曰巫支祁
波神曰陽侯游光畢方火神也清明金神也沐腫水神也
彭侯雲陽木精也獮羊賈誼土精也

黃帝攝政時有蚩尤兄弟八十一人

海鵬案路史作七十二人

並獸身人

語銅頭鐵額食沙石子造立兵仗刀戟大弩威振天下誅殺
無道不仁不慈萬民欲令黃帝行天子事黃帝以仁義不能
禁止蚩尤遂不敵黃帝仰天而嘆天遣元女下授黃帝兵信
神符制伏蚩尤帝因使之主兵以制八方蚩尤沒後天下復
擾亂不寧黃帝遂畫蚩尤形象以威天下天下咸謂蚩尤不
死八方萬邦皆為弭伏

賁居子曰昔漢祖持項王頭以下魯城亦師此意然則
軒轅得蚩尤而立其威彼蚩尤者亦得軒轅而顧成其

神耳

流洲在西海中地方三千里上多山川積石名爲昆吾石冶
其石爲鐵作劍光明四照洞如水精以割玉如泥

元洲在北海中地方三千里去南岸十萬里上有芝草生元
澗澗水如蜜味服之長生

歲暮夕四更中取二七豆子二七麻子家人頭髮少許合麻
豆著井中咒勅井使其家竟年不遭傷寒辟五方疫鬼

懸艾虎鼻門上宜官子孫帶印綬懸艾虎鼻門中周一年取
燒作屑與婦飲之二月中便有娠生貴子勿令人知之泄則

不驗也亦勿令婦見之

七月七日取小赤豆男吞一七女吞二七令人畢歲無病又
七月七日曬曝革裘無蟲又七月七日取烏雞血和三月三

日桃花末塗面及遍身三二日肌白如玉

冬以臘月鼠斷尾正月旦日未出時家長斬鼠著屋中祝云
付勅屋吏制斷鼠蟲三時言功鼠不敢行

埋蠶沙於宅亥地大富得蠶絲吉利以一斛二斗甲子日鎮
宅大吉致財千萬

婦人無以夫衣合集浣之使之不利 無以賣馬錢娶婦以
賣馬錢娶婦令多惡病夫妻離別

白馬元頭食之殺人下病食馬肉亦殺人 羊有一角食之

殺人 元雞白頭食之殺人雞有四距亦殺人六指亦殺人
雞有五色亦殺人 犬狗魚鳥不熟食之成痕痛 瓜有兩
鼻者殺人

按太清外術生人髮挂果樹鳥鳥不敢食其實 瓜兩鼻
兩蒂食之殺人 簷下滴菜有毒薑黃花及赤芥殺人

瓠牛踐苗則子苦 大醉不可臥黍穰上汗出眉髮落
婦人有娠食乾薑令胎內消 十月食霜菜令人面無光

三月不可食陳菹 沙衣結治蠹蝮瘡 井口邊草主
小兒夜啼著母臥薦下勿令知之 黃芪苔療天行 寡

婦藁薦草節去小兒霍亂 自縊死繩主顛狂 孝子衿
灰傅面酏 東家門雞棲木作灰治失音 砧垢能蝕人

履底 古櫬板作琴底合陰陽通神 魚有睫及目合腹

中目連珠二目不同連鱗白鬣腹下丹字並殺人 鼈目
白腹下五字十字不可食 蟹腹下有毛殺人 蛇以桑

柴燒之則見足出 獸岐尾鹿斑如豹羊心有竅悉害人
馬夜眼五月以後食之殺人 犬懸蹄肉有毒 白馬

鞍下肉傷人五臟 鳥自死目不閉鴨目白鳥四距卵有
八字並殺人 凡飛鳥投人家井中必有物當拔而放之

水脈不可斷井中沸不可飲酒漿無影者不可飲 蝮
與青蛙地中最毒蛇怒時毒在頭尾 凡冢井間氣秋夏

中之殺人先以雞毛投之毛直下無毒迴旋而下不可犯
當以醋數斗澆之方可入矣 頗梨千歲冰所化也 琉

古微書卷三十四
瑪瑙先以自然灰煮之令軟可以雕刻自然灰生南海
瑪瑙鬼血所化也

高皇攝政總萬庭四海歸詠治威明文德道化承天精元祚
興隆協聖靈

古微書卷三十四

古微書卷三十五

洛書緯

漢儒傳洪範以初一五行六十五字徑爲洛書本文旣
有本文又何云戴履肩足白文二十五黑文二十也雖
然緯書若出漢世者便應演洪範之文而語不及範固
知出春秋季世矣今讀其文大類讖詞豈河圖主緯洛
書主讖耶

洛書靈准聽

所述多太古溟滓以上故言其幽靈忽恍不可爲象而
但溢于聽謂聽之以氣也非聲也

洛水者地理陰精之官帝王明聖龜書出文天以與命地以

授瑞按河合際居中護羣王道和洽吐圖佐神逆名亂教摘
亡弔存故聖人觀河洛也

按乾坤鑿度孔子曰帝德之應洛水先温九日後五日變
為五色元黃天地之靜書見矣負圖出午聖人見五日以
五日見十日以十日見十五日以十五日見二十日以二
十日見二十五日以二十五日見三十日以三十日又曰
帝王始起河洛龍馬皆察其首蛇亦然其首黑者人正其
首白者地正其首赤者天正謹其友生之甲乙丙丁戊己
庚辛壬癸各居應其國中以動靜逆順此天地神靈佐助
之期吉凶之應注各居其國者若甲為齊乙為東夷王者
起於此國中龍則用其卦日蛇則用其卦

月動謂河洛水靜謂
陵陸地各如其迹也

氣五機七八合提九爻結八九七十二錄圖起

鄭元注曰氣
五寓之五行

機七十二里也二十八宿以存焉二者用事以卦相提得
一歲俱終而太一行九宮及位遊相結每宮如卦之日則參
差矣八九相乘七十二歲而七百二十歲復於
冬至甲子生象其數以為軌焉故曰錄圖起之

按乾坤鑿度欲求水旱之厄以位入軌年數除軌算盡則
厄所遭也甲乙為饑丙丁為旱戊己為中興庚辛為兵壬
癸為水臥算為年立算為日必除先入軌年數水旱兵饑
得矣如是乃救災度厄扶陽之法

天皇頡贏三舌驤首鱗身碧盧禿揭地皇十一君皆女面龍
頰馬躡虵身人皇龍身九頭驤首達腋地皇氏逸于有人皇
九男相像其身九章 相厥山川形成勢集才為九州謂之
九圃 人皇始出於提地之國九男兄弟相像以別長九州

已居中州以制八輔 人皇氏駕六提羽乘雲祇車 人皇
別長九州離良地精生女爲后夫婦之道始此
屬山氏產山谷分布元氣卽烈山氏

按洞神經天皇氏以獲爲名以望爲姓字子潤地皇姓鑑
名嶽字子元人皇姓愷名胡洮字文生

項竣始學篇天地立有天皇十三頭號曰天靈治萬八千
歲以木德王地皇十二頭治萬八千歲人皇九頭兄弟各
三千三百歲依山山川土地之勢裁度爲九州各居一方因
是而區別

皇道缺故帝者興

赤帝之爲人視之豐長八尺七寸豐下兌上龍顏日角八采

三眸鳥庭荷勝琦表射出握嘉履翌竅息洞通

舜長九尺太上員首龍顏日衡方庭甚口面頤亡髦懷珠握
袞形卷婁色鬢露日童重曜故曰舜而原曰重華

禹身長九尺有六虎鼻河目齟齒鳥喙耳三漏戴成鈴襄玉
斗玉盩履已

有人方面日衡重華衡有骨表如日也眉握石椎懷神珠讀

如錘言能平輕重也握謂知玉璿璣玉衡以齊七政歷象日

月星辰正月上日舜受終鳳凰儀黃龍感朱草生蓂莢孳西

王母授益地圖

有人謂禹也大口兩耳參漏足文履已漏空也戊己土之日故

首戴鈎鈐有骨表如鈎鈐胸懷玉斗懷璇璣玉衡之道或以

有人出石夷掘地代戴成鈴懷玉斗

按拾遺記禹鑿龍關之山亦謂之龍門至一空巖深數十里幽暗不可復行禹乃負火而進有獸狀如豕銜夜明珠其光如燭又有青犬行吠於前禹計可十里迷於晝夜既覺漸明見向來豕犬變為人形皆著元衣又見一神蛇身人面禹因與語神即示禹八卦之圖列於金板之上又有八神侍側禹曰華胥生聖子是汝耶答曰華胥是九河神女以生余也乃探玉簡授禹長一尺二寸以合十二時之數使量度天地禹即持執此簡以平定水土蛇身之神即羲皇也

賁居子曰自混沌盤古氏為一開闢伏羲氏為再開闢

至大禹為開闢之三矣故雜書汲汲推大禹云

又按乾坤鑿度孔子曰復表日角

表者人形體之章誠也名復者初震爻也震之

體在卯日於出焉又初應在六四於辰在丑為牛牛有角復人表象臨表龍顏名臨者二爻為龍應在上故臨人表在頰也泰表載干干楯也名泰者艮為山山為石體有以行懼難之器云應大壯表握訴龍

角大辰

辰者龍也辰在斗魁所

之脣四名卦而震為龍故

夬表升骨履文

辰名夬者五立於

者又五於人體當艮卦於夬亦手體成其四則震爻也為足其三猶艮爻於十次值本於析七曜之行起焉七者屬文北斗在骨足履姤表耳參漏足履王知多權

姤初爻為風風有聲而無形也九竅之分目視形耳聽聲人聲屬坎坎為水水為孔穴象消卦其道五事曰聽耳而三漏聽之至巽為股初爻最在下足象消卦其姤離為明人君南面而治焉足行於其上姤人表覆王是繇然王人君最尊

者離又為火火者土寄位焉土數五當如垢氣于其上故
 八兼更得性耳巽為進退又為近利有知即以進退求利
 此謂之姤焉者陰氣之
 始故因其表見其情
 遯表日角連理
 名遯者以離爻也
 六月於辰未未為羊有角離南方之卦也五均南方為衡
 人之眉上曰衡衡者平地連理或謂連珠者其骨起衡之
 遯人表亦少然詩含神霧
 否表二好文
 否卦者三也三
 云四角主張熒惑司過也
 否表二好文
 否卦者三也三
 在互體艮之中艮為木多節否人之表二時象
 觀表出準
 之與三艮卦體互坤坤為文故性亦好文也
 虎名觀者亦在五艮之中而位上艮為山澤山通氣其於
 人表則鼻也艮又門闕觀謂之闕準在鼻上而高顯觀
 當兌之上兌為口虎唇又象焉
 剝表重瞳明歷元
 名剝者
 五離爻離為日瞳日子六五于辰又在卯卯酉屬也剝離
 人表重焉五月卦體在艮終萬物始萬物莫盛乎艮歷數
 以有終始剝人兼之性自然表象
 此皆律歷運期相一匡
 參差神實為之難得縷耳所聞差
 之神也欲所按合誠
 之主正月不三者此人心
 之合誠春秋讖卷名也
 賁居子曰自古論形相未有參以卦象者此道精眇矣

故述其大端若斯

黑帝子湯長八尺一寸或曰七尺連珠庭臂二肘

湯臂有四肘在亳能修其德東至於洛觀帝堯之壇沈璧退
 立黃魚雙踴黑鳥隨魚止于壇化為黑玉又有黑龜並赤文
 成字言夏桀無道湯當代之

檇杙之神見于邳山有神牽白狼銜鉤而入商朝金德將盛
 銀白山溢湯將奉天命以放桀夢及天而錫之遂有天下

按周書殷祝解湯將放桀於中野士民間湯在野皆委貨
 扶老攜幼奔國中虛桀請湯曰國所以為國者以有家家
 所以為家者以有人也今國無家無人矣君有人請致國
 君之有也湯曰否昔大帝作道明教士民今君王滅道殘

政士民惑矣吾爲王明之士民復致於桀曰以薄之居濟民之賤何必君更桀與其屬五百人南徙千里止於不齊民往奔湯於中野桀復請湯言君之有也湯曰否我爲君王明之士民復重請之桀與其屬五百人徙於魯魯士民復奔湯桀又曰國君明之士民復奔湯桀又曰國君之有也吾則外人有言彼以吾道是耶我將爲之湯曰此君王之士也君王之民也委之何湯不能止桀湯曰欲從者從君桀與其屬五百人去湯放桀而復薄三千諸侯大會湯退再拜從諸侯之位湯曰此天子位有道者可以處之天子非一家之有也有道者之有也故天下者唯有道者理之唯有道者紀之唯有道者宜久處之湯以此讓三千諸

侯莫敢卽位然後湯卽天子之位與諸侯誓曰陰勝陽卽謂之變而天弗施雌勝雄卽謂之亂而人弗行故諸侯之治政在諸侯之大夫治與從

湯之事罕有聞者以其匿汲冢書中輒爲標出

有人雄起戴玉英祈旦失籥亡其金虎東南紛紛又精起昌光出軫已圖之

有鳳凰銜書游文王之都書文曰殷帝無道虐亂天下皇命已移不得復久靈祇遠離百神吹去五星聚房昭理四海

按國語惠王十五年有神降於莘內史過曰昔夏之興也融降於崇山其亡也回祿信於聆隧商之興也檮杌次於邳山其亡也夷羊在牧周之興也鸞鷲鳴於岐山次衰也

杜伯射王於郟王曰今是何神也對曰昔昭王娶於房曰
房后實有爽德協於丹朱丹朱馮身以儀之生穆王焉實
照臨周之子孫而禍福之若繇是觀之其丹朱乎

賁居子曰明神之降若此其赫也而又有匿形聞聲盡
日交人者如吳太主時羅陽縣有神自稱王表周旋民
間語言飲食與人無異然不見其形又有一婢名紡吳
主遣李崇齋印綬迎表表隨崇俱出及所在郡守令長
談論所歷山川輒遣婢與其神相聞崇與表至權於蒼
龍門外爲立第舍數使近臣齋酒食往表說水旱小事
往往有驗噫史冊所記之神怪莫著于是矣丹朱之
爲穆王遂增出後世輪迴功案其說紛多

蒼帝姬昌日角鳥鼻身長八尺二寸聖智慈理以成草木之
長而順天時水澤不內舟以成魚鱉之長不麝不卵以成鳥
獸之長畋獵唯時不殺童羊不天胎童牛不服童馬不馳不
驚澤不行害十不失其宜萬物不失其性天下不失其時
文王獨坐屏去左右深念遠慮召太公望曰帝王猛暴無文
強梁好武侵凌諸侯苦勞天下百姓之怨心生矣其災予奚
行而得免於無道乎太公曰因其所爲但興其化上知天道
中知人事下知地理乃可以有國焉

武王伐紂渡孟津中流白魚躍入王舟王俯取魚長三尺目
下有赤文成字言紂可伐王寫以世字魚文消燔魚以告天
有火自天止于王屋流爲赤烏烏銜穀焉穀者紀后稷之德

火者燔魚以告天天火流下應以吉也遂東伐紂勝於牧野
兵不血刃而天下歸之

按仁王經世間帝王有其五種一粟散王威德最劣二鐵
輪王治閻浮提三銅輪王兼二天下四銀輪王化三天下
五金輪王統四天下

廣宏明集云此之五王論其位上下不同語其德勝劣有
異推秦皇漢武閻浮提內唯王震且五種王中粟散王也

蒼帝起天雨粟

有白雲出自蒼梧入于大梁

有氣象人青衣無手在日西天子之氣象也

蒼帝起青雲扶日赤帝起赤雲扶日黃帝起黃雲扶日白帝

起白雲扶日

按晉志天子氣內赤外黃四方所發之處當有主者若天
子欲有遊往處其地亦先發此氣或如城門隱隱在氣霧
中恒帶殺氣森森然或如華蓋在氣霧中或氣象青衣人
無手在日西或如龍馬或雜色鬱鬱衝天者此皆帝王氣
太白守心後九年大饑熒惑守心逆臣起

按天官書太白白比狼赤比心黃比參左肩蒼比參右肩
黑比奎大星亢爲疏廟太白廟也太白大臣也其號上公
熒惑從太白軍憂離之軍却其入守犯太微軒轅營室主
命惡之心爲明堂熒惑廟也謹候此

王者不藏金玉則紫玉見於深山服飾不踰祭服則玉英出

靈龜者元文五色神靈之精也上隆法天下平象地能見存亡明於凶吉王者不偏黨尊者老則出

按爾雅一曰神龜二曰靈龜三曰攝龜四曰寶龜五曰文龜六曰筮龜七曰山龜八曰澤龜九曰水龜十曰火龜周禮鄭元注六龜之屬天龜元地龜黃東龜青西龜白南龜赤北龜黑龜俯者靈仰者繹前弁果後弁獵左倪靄右倪若是其體也東龜南龜長前後在陽象經也西龜北龜長左右在陰象緯也天龜俯地龜仰東龜前南龜卻西龜左北龜右各從其耦

比讀褚先生傳龜名又異一曰北斗龜二曰南辰龜三曰五星龜四曰八風龜五曰二十八宿龜六曰日月龜七曰

九州龜八曰玉龜凡八名龜龜圖各有文在腹下文云云者此某之龜也記曰能得名龜者財物歸之家必大富至千萬宋元王之得龜也孔子聞之曰神龜知吉凶而骨直空枯曰爲德而君於天下辱於三足之烏月爲刑而相佐見食於蝦蟇蝟辱於鵲騰蛇之神而殆於卽且竹外有節理中直空虛松柏爲百木長而守門閭日辰不全故有孤虛黃金有疵白玉有瑕事有所疾亦有所徐物有所拘亦有所據罔有所數亦有所踈人有所貴亦有所不如何可而適乎物安可全乎天尚不全故世爲屋不成三瓦而陳之以應之天天下有階物不全乃生也又卜禁曰子亥戌不可以卜及殺龜日中如食已卜暮昏龜之微也不可以

卜庚辛可以殺及以鑽之常以月旦祓龜先以清水澡之
以卵祓之乃持龜而遂之若嘗以為祖人若已卜不中皆
祓之以卵東向立灼以荆若剛木土卵指之者三持龜以
卵周環之祝曰今日吉謹以梁卵煇黃祓去玉靈之不祥
玉靈必信以誠知萬事之情辨兆皆可占不信不誠則燒
玉靈揚其灰以徵後龜其卜必北向龜甲必尺二寸

賁居子曰自夫子贊易著重而龜不傳矣褚生補此猶

上古墨灼之遺法歟即以為卜經亦可

鰓鰓魚狀如鵲食之不痺出涿光之山

海鵬案痺別本作瘳

按山海經諸鳥食之有益人者黃鳥不如鴝宜子盤鴝已
喝鴝鴝無臥肥遺已癩櫟已痔數斯已瘦鬻已腹痛又已

痾鷓鴣不饑馱已墊橐巷不畏雷鷓鴣不魘當康不眴目眩

也白鵠已噬痛又已痢鳩渠已曝起皮也佩之鴟鷂如餘俱

辟火寓辟兵青耕辟疫 諸獸食之有益者往往善走類

不如九尾狐不蠱天狗已痺耳鼠不睬腹脹也蠶蜥不眯獐

不風佩之傳訑不畏謹孟槐天狗俱禦凶臙疏辟火臧羊脂

傳之已腊體皺 諸魚食之有益者鱧無腫鯈無蠱又不癡

赤鱮已疥文鰭已狂冉遺不眯鱧滑鱗俱已疣何羅已癰

修辟已白癩儵已憂鮪已狂鯨不驕鮒已嘔箴不疫蟹不

癘莖不糲佩之鰓鰓禦火

陪臣執命王公望風謀始合羣下並附諸侯歸心則月舉足

垂爪

古微書卷三十五

古微書卷三十六

洛書甄曜度

緯書以曜稱者凡四見曰靈曜曰文耀曰耀鉤曰耀嘉
未有博極軌度者惟洛書所構旁蠡周天罔不具悉蓋
星歷之學聖門所首務焉後世不第棄置之而且曰知
星宿衣不覆率用爲戒矣嗟乎士子出其戶舉目則見
天而顧不解列宿爲何物也亦足羞矣夫天事恒象象
則顯矣昭昭矣何難知哉人自不學耳

周天三百六十五度四分度之一夫一度爲千九百三十二
里則天地相去六十七萬八千五百里周天一百七萬一千
里一度爲二千九百三十二里七十一步二尺七寸四分四

百八十七分分之三百六十二
推廣九道百七十一歲進退六十三分百四十四歲一超次
與天相應

按晉志周天三百六十五度五百八十九分度之百四十五半覆地上半在地下其二端謂之南極北極北極出地三十六度南極入地三十六度兩極相去一百八十二度半彊繞北極徑七十二度常見不隱謂之上規繞南極七十二度常隱不見謂之下規赤道帶天之絃去兩極各九十一度少強黃道日之所行也半在赤道外半在赤道內與赤道東交於角五少弱西交於奎十四少強其赤道外極遠者去赤道二十四度斗二十一度是也其入赤道內

極遠者亦二十四度并二十五度是也日南至在斗二十一度去極百一十五度少強是也陸績云天東西南北徑三十五萬七千里此言周三徑一也考之徑一不啻周三率周百四十二而徑四十五則天徑三十二萬九千四百一里一百二十二步二尺二寸一分七十一分分之十以句股法言之旁萬五千里句也立八極萬里股也從日邪射陽城弦也以句股求弦法入之得八萬一千三百九十四里三十步五尺三寸六分天徑之半而地上去天之數也倍之得十六萬二千七百八十八里六十一步四尺七寸二分天徑之數也以周率乘之徑率約之得五十一萬三千六百八十七里六十八步一尺八寸二分周天之數

也

又按周髀算經周天七衡周而六閒是故一衡之間萬九千八百三十三里三分里之一卽爲百步內一衡徑二十三萬八千里周七十一萬四千里分爲三百六十五度四分度之一度得一千九百五十四里二百四十七步千四百六十一分步之九百三十三次二衡徑二十七萬七千六百六十六里二百步周八十三萬三千里分里爲度度得二千二百八十里百八十八步千四百六十一分步之千三百三十二次三衡徑三十一萬七千三百三十三里一百步周九十五萬二千里分爲度度得二千六百六里百三十步千四百六十一分步之二百七十次四衡徑三

十五萬七千里周一百七萬二千里分爲度度得二千九百三十二里七十一步千四百一十分步之六百六十九次五衡徑三十九萬六千六百六十六里二百步周一百一十九萬里分爲度度得三千二百五十八里十二步千四百六十一分步之千六十八次六衡徑四十三萬六千三百三十三里一百步周一百三十萬九千里分爲度度得三千五百八十三里二百五十四步千四百六十一分步之六次七衡徑四十七萬六千里周一百四十二萬八千里分爲度度得三千九百九里一百九十五步千四百六十一分步之四百五周二百四十三萬里分爲三百六十五度四分度之一度得六千六百五十二里二百九十九

古微言卷三十一
三
三步千四百六十一分步之三百二十七過此而往者未
之或知又曰陰陽之數日月之法十九歲爲一章四章爲
一部七十六歲二十部爲一遂遂千五百二十歲三遂爲
一首首四千五百六十歲七首爲一極極三萬一千九百
二十歲生數皆終萬物復始天以更元作紀歷

甄鸞注引乾鑿度曰甲子爲部首七十六歲次得癸卯部
七十六歲次壬午部七十六歲次辛酉部七十六歲凡三
百四歲木德也主春生次庚子部七十六歲次己卯部七
十六歲次戊午部七十六歲次丁酉部七十六歲凡三百
四歲金德也主秋成次丙子部七十六歲次乙卯部七十
六歲次甲午部七十六歲次癸酉部七十六歲凡三百四

歲火德也主夏長次壬子部七十六歲次辛卯部七十六
歲次庚午部七十六歲次己酉部七十六歲凡三百四歲
水德也主冬藏次戊子部七十六歲次丁卯部七十六歲
次丙午部七十六歲次乙酉部七十六歲凡三百四歲土
德也主致養其德四正子午卯酉而期四時焉凡一千五
百二十歲終一紀復甲子故謂之遂也

賁居子曰星紀分野之度自兩漢歷志古星經外則蔡
邕月令皇甫世紀其分秒已縷縷矣未有及雲漢者偶
讀唐志得僧一行兩戒之辨起乎雲漢而始知周天之
度又古法所未盡者謹誌爲殿

按僧一行曰天下山河之象存乎兩戒北戒自三危積石

負終南地絡之陰東及太華逾河並雷首底柱黃屋太行北抵常山之右乃東循塞垣至滅貊朝鮮是謂北紀所以限戎狄也南戒自岷山嶓冢負地絡之陽東及太華連商山熊耳外方桐栢自上洛南逾江漢攜武當荆山至于衡陽乃東循嶺徼達東甌閩中是謂南紀所以限蠻夷也故星傳謂北戒爲胡門南戒爲越門河源自北紀之首循雍州北徼達華陰而與地絡相會並行而東至太行之曲分而東流與涇渭濟瀆相爲表裏謂之北河江源自南紀之首循梁州南徼達華陽而與地絡相會並行而東及荆山之陽分而東流與漢水淮瀆相爲表裏謂之南河故於天象則宏農分陝爲兩河之會五服諸侯在焉自陝而西爲

秦涼北紀山河之曲爲晉代南紀山河之曲爲巴蜀皆負險用武之國也自陝而東三川中岳爲成周西距外方大伾北至于濟南至干淮東達距野爲宋鄭陳蔡河內及濟水之陽爲都衛漢東濱淮水之陰爲申隨皆四戰用文之國也北紀之東至北河之北爲邢趙南紀之東至南河之西爲荆楚自北河下流南距岱山爲三齊夾右碣石爲北燕自南河下流北距岱山爲鄒魯南涉江淮爲吳越皆負海之國貨殖之所阜也自河源循塞垣北東及海爲戎狄自江源循嶺徼南東及海爲蠻越觀兩河之象與雲漢之所始終而分野可知矣於易五月一陰生而雲漢潛萌於天稷之下進及井鉞間得坤維之氣陰始達于地上而雲

漢上開始交於列宿七緯之氣通矣東井據百川上流故
鶉首爲秦蜀墟得兩戒山河之首雲漢達坤維右而漸升
始居列宿上觜觴參伐皆直天關表而在河陰故實沈下
流得大梁距河稍遠涉陰亦深故其分野自漳濱卻負恒
山居北紀衆山之東南外接髦頭地皆河外陰國也十月
陰氣進踰乾維始上達于天雲漢經營室東壁間升氣悉
究與內規相接故自南正達于西正得雲漢升氣爲山河
上流自北正達于東正得雲漢降氣爲山河下流陬訾在
雲漢升降中居水行正位故其分野當中州河濟間且王
良閣道由紫垣絕漢抵營室上帝離宮也內接成周河內
皆豕韋分十一月一陽生而雲漢漸降退及艮維始下接

于地至斗建間復與列舍氣通於易天地始交泰象也踰
析木津陰氣益降進及大辰升陽之氣究而雲漢沈潛于
東正之中故易雷出地曰豫龍出潛爲解皆房心象也星
紀得雲漢下流百川歸焉析木爲雲漢末派山河極焉故
其分野自南河下流窮南紀之曲東南負海爲星紀自北
河末派窮北紀之曲東北負海爲析木負海者以其雲漢
之陰也唯陬訾內接紫宮在王畿河濟間降婁元枵與山
河首尾相遠麟頤頊之墟故爲中州負海之國也其地當
南河之北北河之南界以岱宗至於東海自鶉首踰河戒
東曰鶉火得重離正位軒轅之祇在焉其分野在河華之
交東接祝融之墟北負河南及漢蓋寒燠之所均也自析

木紀天漢而南曰大火得明堂升氣天市之都在焉其分野自鉅野岱宗西至陳留北負河濟南及淮皆和氣之所布也陽氣自明堂漸升遠於龍角曰壽星龍角謂之天關於易氣以陽決陰夬象也升陽進踰天關得純乾之位故鶉尾直建巳之月內列太微為天廷其分野自南河以負海亦純陽地壽星在天關內故其分野在商亳西南淮水之陰北連太室之東自陽城際之亦巽維地也

洛書摘六辟

此蓋祧諸帝矣而耑於茫眇之代間取其道德尤元者斬于六君云

孔子曰洛書摘六辟曰建紀者歲也成姬昌有命在河聖孔

表雄德庶人受命握麟徵易歷曰陽紀天心建紀者謂大易

數此道成於文王聖也孔表雄著漢當與以庶人之有仁德受命為天子此謂使以獲麟為應易猶象也孔子以歷說易名曰象也今易象四篇是紀古說假借字耳別序聖人題錄興亡州土名號姓輔

友符言孔子將此應之亡殷者紂黑期火戊倉精受命女正

昌効紀承餘以著當火戊午部也午為火必言火戊者木精將王為之相戊土也又當為火子又

火使其子為已塞水是助倉精絕殷之象字或作之次是民

沒六皇出天地命易以第絕宋均曰次民沒民始穴處之辰

放大頭四乳號曰皇次屈出地勃辰放次屈之名駕六飛麟

從日月飛麟獸有翼能飛者治二百五十歲

洛書錄運法

此其書亦必有關運位蓋隱識存焉而世不聞耳

黃帝坐元扈閣上與大司馬容光左右輔將周昌二十二八
臨觀鳳圖一作臨觀鳳凰之至

舜以太尉受號為天子五年二月東巡狩至於中州與三公
諸侯臨觀黃龍五采負圖出置舜前也

孔子曰昔逢氏抱小女末嬉觀帝為履癸妃一本逢氏抱小
女妹嬉帝孔甲說之以為太子履癸妃

有人卯金握天鏡

按竹書紀年癸命扁伐山民山民女于桀二人曰琬曰琰
后愛二人女無子焉斲其名于茗華之玉茗是琬華是琰
而棄其元妃于洛曰妹喜於傾宮飾瑤臺居之
述異志夏桀宮中有女子化為龍不可近俄而復為婦人

甚麗而食人桀命為蛟妾告桀吉凶惟楚莊王時宮人一
旦而化為野蛾飛去此為最奇

河洛讖

孔子河洛讖

二口建戈不能方兩金相刻發神鋒空穴無主奇人中女子
獨立又為雙

注二口建戈劉字也晉金行劉姓又金故曰兩金空穴奇
入為寄字女加又奴字

錄運期讖

九侯七傑爭民命炊骸道路誰使主者元且來謂劉元德也

甄曜度讖

赤三德昌九世會備合帝際指劉備也

沙流不言小人起擅百川亂不言小人執政

古微書卷三十六終

皇清嘉慶十四年歲在屠維大荒落相月昭文張海鵬較梓

